


LUKUMU YA BANA ²

 Munu . . . mu me kwisa na nsukinina fioti. Mu vwanaka na muntu mosi ya kingolo-ngolo, ya kingolo-ngolo mingi, mpe mu zolaka kwenda kaka na ntangu yina, samu ba vwanaka mbote ve, kielieka mbote ve. Mpe mu nataka tomabilu katuka na Michigan, shérif bokilaka, mpe nionso yina, samu bawu vwanaka mbote ve, kielieka mbote ve. Ntangu yayi, kasi ya ke vwanda mbote mingi; mambu nionso—mambu nionso kele na nsi ya luyalu, na yawu ya ke mbote. Ntangu Mfumu ke kwisa, mambu nionso kele na nsi ya luyalu na ntangu yina, mutindu yina ve? Oh, Yandi—Yandi kele mbote mingi; kubanza mambote ya Yandi mpe mawa ya Yandi, yina Yandi zola tuba samu na beto, mpe mutindu balukumu ya Yandi kele ya ntalu.

Mbote, beto vwanaka meka na kubanda, na kutubaka ti beto zola baka makapu tatu ya ntete ya Buku ya ba-Éphésiens. Mpe mu banza ti beto me kuzwa bampova tatu ya ntete, to *bima* tatu ya ntete kuna. Beto kwendaka ntama mingi ve, kasi mu banza nkokila yayi beto lenda kwenda fioti ntama. Ntangu yayi, mu zola tuba ti mu kele mulongoki ya Biblia ve, kubanda ntama, mpe ntama na kuvwanda théologien, kasi mu—mu zola Mfumu, mpe mu zola kusadila Yandi mpe . . . [Mpangi-bakala mosi ke na kutuba na Mpangi Branham—Mu.]

Muntu mosi, me tuba, ya ke na diambu mosi ya nswalu mingi, kaka ntete beto kwenda na ntwala ntangu yayi, mwa mwana-kento mosi kele na lupitalu na Louisville, mpe ba-specialiste nionso ya kulutila mbote me bika yandi, yandi ke na kufwa na ntangu yayi, mpe yandi me pesa lombilu samu na mwana yayi. Mutindu Baklisto, ya kele kisalu ya beto na kukulumusa bayintu ya beto, ntangu yayi, samu na kusambila.

Mfumu ya beto yina me fuluka na lemvo, ya kele ve kaka kisalu ya beto, kasi ya kele mbote ya beto, mpe ya kele nsatu ya beto—ya beto ti beto kukulumusa bayintu ya beto na nkokila yayi mutindu dibuundu, mutindu nkonga ya bantu yina ba me bokila na kubasika, bantu yina ke kwikila awa na nkokila yayi, samu na kulonga Ndinga ya Nge, yina ke tula beto na kisika ya beto na kati ya Nzutu, na kisika ya beto, mpe kisika beto lenda sala mbote-mbote kintwadi mutindu binama ya Nzutu ya Klisto.

² Mpe ntangu yayi ba me lomba beto na kukwenda mbala mosi na Nzambi. Mpe mosi na mosi ya beto batata ke banza ti, yinki kana yina vwanaka mwana ya beto ya kento, wapi mutindu bantima ya beto zolaka pela mpe kulwala na kati ya beto, mpe beto zolaka lomba na mabuundu na kusambila na nswalu nionso. Mpe ntima ya tata mosi ke na kupela, ke na mpasi. Mfumu, bika ti Muntu yina ya nene ya Mpeve-Santu kukwisa kaka na ntangu

yayi na ntima ya tata yina. Katula konso kivudi ya ntembe, mpe mpasi nionso, mpe bika yandi zaba ti Nge kele Nzambi mpe ti kimbevo mosi ve lenda telema na Ntwala ya Nge ntangu dibuundu ya Nge mpe bantu ya Nge me sadila lutumu ya Nge ya Kinzambi.

³ Mpe mutindu na kati ya lumingu, beto vwandaka me sambila, kubanda na Lumingu me luta mu vwandaka banza na mitindu yayi to mitindu yayi yina zola tuba kisambu. Beto ke na munduki ya ngolo ve na ntwala ya yinza, kasi mwa lanse yayi ke pesaka lufwa ntangu ya kele ya kusimba na misapi ya lukwikilu. O Mfumu, bika ti bisambu ya beto kukuma na kisika yango, ti lufwa yina kele kuna na zulu ya mwana yina, mpe bika ti yawu kutiamuka; mudidi, bampimpa, kukatuka na lweka ya mbeto ya mwana yina, bébé yina to mwana yina, mwa mwana-kento. Mpe bika ti Nsemo yina ya nene ya Mvwandulu ya Nzambi kusema na zulu ya yandi. Bika yandi kubasika na lupitalu yina, mwana mosi na mavimpi ya mbote.

⁴ Nzambi, beto zaba ti na simu yina ya nzadi bankundi ya beto ya luzolo ke na kuingila, mpe ya ke diambu mosi ya nkembo. Kasi beto zola bana ya beto. Mpe beto ke sambila, Mfumu, ti samu na nkembo ya Nge, ti Nge ke keba luzingu ya mwana yina. Beto, mutindu dibuundu ya Nge, beto ke nganina lufwa yina, mpe beto ke tuba, “Sikama kuna. Nge lenda baka mwana yina ve, samu beto ke lomba luzingu ya yandi samu na zola ya Kimfumu ya Nzambi.” Pesa bima yayi, Mfumu, ti yawu mbala mosi kukwenda na lukanu ya yawu na yina beto me sungika yawu, na Nkumbu ya Yesu Klisto, Mvulusi ya beto. Amen.

⁵ Beto me kwikila? Mu zaba ve yinki mu zolaka sala kana mu vwandaka Muklisto ve. Mu zolaka zola kaka ve kuvwanda ntangu ya yinda. Ya kele na kikuma yankaka ve na kuzingila, kaka kuvulusa bayankaka, kele kima ya kulutila kitoko yina mu me zaba.

⁶ Ntangu yayi, na nkokila yayi beto zola banda na kuvutukila fioti yina beto longaka na dilongi ya beto me luta. Mpe mu ke meka na kutanga, samu, kapu ya muvimba, kana mu lenda sala yawu na nkokila yayi. Na yawu na Lumingu na suka mu fwana baka mu banza balukutakanu zole Lumingu na suka mpe na nkokila, kana ya kele mbote, samu na kumeka kutalisa yina mu zola ti dibuundu kumona. Oh, ya kele nkembo na kuzaba kisika ya beno! Mpe muntu mosi ve lenda sala kima mosi kana beno me zaba kieleka ve yina beno ke na kusala.

⁷ Yinki ke salama kana nge ke vwanda . . . ba ke pasula nge, mpe ti ya vwandaka na dokotolo mosi ya ntwenia yina me katuka kaka na lukolo ti yandi zola . . . yandi me pasulaka ntete muntu ve. Na yina, yandi kele ntwenia mpe kitoko, mpe yandi me benda bansuki ya yandi kitoko, mpe yandi me lwata mbote, kitoko, mpe nionso yina. Mpe yandi ke tuba, “Mu me yidika bampele, mpe

mu me kufwa bamikolobo nionso na bisadilu mpe nionso yina.” Kasi beno ke tala yawu mwa yimbi. Mu ke zola kuvwanda na dokotolo ya kiboba yina me pasulaka bantu bambala mingi na ntwala, na ntwala mu kundima yandi pasula munu. Mu—mu ke zola kuzaba muntu mosi yina me basika kaka na lukolo mosi ve, mu zola muntu yina kele na nzingilu mosi.

⁸ Mpe Mosi yina kele na nzingilu ya kulutila nene yina mu me zaba, yina mu ke bokila na nkokila yayi, ya kele Mpeve-Santu. Yandi kele Dokotolo ya nene ya Nzambi mpe Mulongi ya nene.

⁹ Mpe mutindu fondasio samu na Nsangu ya munu na nkokila yayi, mu ke vutuka na dilongi ya munu ya Lumingi, ya ke . . . Bawu losaka Samuel na Ndinga ya Mfumu; mpe ndimaka Saül, mwana ya Kish; mpe losaka Samuel, yina talisaka Mpeve-Santu, samu yandi tubaka kaka mutindu Mpeve twadisaka yandi na kutuba. Mpe ntangu yandi kebisaka bawu samu na yawu, yandi tubaka, “Beno bambuka moyo, mu me tubaka na beno ata fioti ve ya kima mosi na Nkumbu ya Mfumu yina Mfumu me lungisaka ve. To mu me vwandaka ntete ve na ndiatulu ya yimbi na ntwala ya beno. Mpe mosi ve lenda fundisa munu na disumu.”

Mutindu Yesu tubaka, “Nani lenda fundisa Munu na disumu?” Beno me mona?

¹⁰ Mpe yandi tubaka diaka, ti, “Mu me kwisa ve na beno samu na kulomba beno mbongo mpe nionso yina. Mu bakaka kima mosi ve na beno. Kasi nionso yina mu me tuba vwandaka samu na mambote ya beno, yina mu me zabisaka beno na yinwa ya Mfumu.”

¹¹ Mpe bantu nionso me pesa kimbangi, “Ya kieleka. Nionso yina kele ya kieleka, kasi beto zola vwanda kaka na ntinu mosi. Beto zola kuvwanda mutindu bantu yankaka ya yinza.”

¹² Ntangu yayi, na nkokila yayi, Masonuku ya beto ke na kukabisa Buku ya Éphésiens, ya kele Buku ya Josué ya Ngwisani ya Malu-malu. Ya ke na kukabisa yawu mpe ya ke na kutula “banungi” na kisika ya bawu. Ntangu yayi, mu ke vutuka fioti na manima samu na mwa minuti fioti, samu na kuzwa kisika na ntwala beto banda na kutanga, kubanda na nzila ya 3. Ntangu yayi, beto me mona na Lumingi me luta ti . . . Nzambi na kati ya Ngwisani ya Ntama pesaka nsilulu ya yinsi ya kupema, samu ti bawu kukumaka bizieti mpe vwandaka kwenda sika na sika. Mpe bawu vwandaka na yinsi yina vwandaka ya bawu ve, mpe Nzambi silaka na nzila ya Abraham ti yandi ke zinga, nkuna ya yandi ke zinga bamvula nkama yiya na kati ya bantu ya nzenza, mpe ba ke mona mpasi, kasi na diboko ya ngolo Yandi ke basisa bawu samu na kunata bawu na yinsi ya mbote kisika miliki mpe mafuta ya niosi vwandaka ya kufulukaka.

¹³ Mpe, ntangu yayi, na ntangu nsilulu yina zolaka kusalama, Nzambi telemisaka muntu mosi samu na kunata bawu na yinsi

yango. Bantu yikwa na kati ya yinzo yayi na nkokila yayi yina zaba nani ya vwandaka. . . yina zaba nani ya vwandaka? Moise. Beno tala, kifwanisu ya kieleka, ya kieleka ya Mosi ba pesaka beto samu na kunata beto na Yinsi ya nsilulu, Klisto. Ntangu yayi beto ke na nsilulu mosi, samu nsilulu ya beto kele Kupema ya kimpeve, kasi, ya bawu vwandaka kupema ya nzutu. Mpe na yawu bawu vwandaka kwenda na yinsi yina ba lendaka tuba, “Yayi kele yinsi ya beto, beto ke tambula diaka ve sika na sika beto me kuzwa kisika ya kuvwanda, yayi kele yinsi ya beto, mpe beto ke pema awa. Beto ke kuna blé ya beto, bayinti ya vinu ya beto, mpe beto ke kudia bambuma ya bayinti ya vinu ya beto. Na yawu ntangu beto ke kufwa, beto ke bika yawu na bana ya beto.”

¹⁴ Oh, mutindu beto lenda kulonguka yinsi yango, misiku ya mutindu ya kuyala, mutindu Naomi na Ruth, Boaz. Kuvutukila diaka nionso yina. Mutindu mpangi-bakala mosi na Israel, mutindu yandi fwana. . .konso kima yina yandi zimbisaka fwana kukulama na tata musumbi. Oh, ya ke kitoko mingi! Ya lendaka baka balumingu mpe balumingu mpe balumingu na balumingu, beto ke bika kapu yayi ata fioti ve, beto ke kwenda na yawu. Beto lenda vukisa Biblia ya muvimba awa, na kapu mosi yayi awa.

¹⁵ Mpe, oh, mu ke zolaka kaka kulonguka Yawu. Beto vwandaka baka Yawu, mpe beto vwandaka baka Buku mosi mvula mosi na ndambu, mpe beto vwandaka basika kuna ve. Beto vwandaka bikala kaka na Yawu.

¹⁶ Ntangu yayi, kasi, difwa vwandaka kima mosi ya nene, mutindu difwa yina vwandaka na yinsi ti muntu yankaka ve kasi tata musumbi ya pene-pene lendaka kukula difwa yina. Ntangu yayi, bika munu kupesa beno mwa kidimbu mosi yina mu simbaka mpimpa yankaka yina, samu na beno bamama. Bantu yikwa awa me sambila samu na bayina beno ke zolaka, yina kele ya kuzimbana? Mbote mingi. Beto me kuma diaka kisika yango, beno me mona, “Difwa ya beno.” Beno me mona?

¹⁷ Paul tubaka na ba-Romain, yandi tubaka, “Kwikila na Mfumu Yesu Klisto, mpe nge na yinzo ya nge ke vuluka.” Kana beno ke na lukwikilu mingi samu na kukwikila na mpulusu ya beno mosi, beno vwanda na lukwikilu mingi, ata mutindu yintu ngolo mwana-bakala yina kele, to mwana-kento yina kele, bawu ke vuluka na mutindu nyonso. Nzambi, ke sala yawu na mutindu nionso! Kana Yandi kulalisa bawu na mukongo ya bawu, ya kulala kuna na lupitalu, ke na kufwa, ba ke vuluka. Nzambi silaka yawu. Difwa! Oh! “Mpe ba ke vwanda kuna,” Esaie tubaka, “mpe bana ya bawu nionso ke vwanda na bawu. Ba ke salana yimbi ve to nsoki na zulu ya mongo ya Munu ya santu, me tuba Mfumu.”

¹⁸ Oh, mu ke na mwa kima mosi yina mu ke zola mona na

nkokila yayi, samu na beno. Ya ke pela na kati ya ntima ya munu, ya me fwanana na yayi.

¹⁹ Kasi ntangu yayi, beto kwenda na ntwala. Na yawu beno me bakulaka Moise, yina salaka bimangu yina ya nene yandi nataka Israel tii na yinsi, mpe yandi nataka bawu na yinsi ya nsilulu, kasi yandi pesaka bawu difwa ya bawu ve? Yandi pesaka bawu ve difwa ya bawu; yandi twadisaka bawu kuna na yinsi, kasi Josué kabulaka ntoto samu na bantu. Ya kele mutindu yina? Mpe Klisto me nata dibuundu kuna kisika wapi ba me pesa bawu kimvwama ya bawu, ya me pesa bawu, kuzabuka Jourdain, kasi Mpeve-Santu kele Mosi Yina ke tula dibuundu na ndonga. Josué ya bubu yayi ke tula dibuundu na ndonga, ke pesa na mosi na mosi, makabu, bisika, kisika mosi. Mpe Yandi kele Ndinga ya Nzambi yina ke na kutuba na nzila ya muntu ya kati yina Klisto me vulusa, Mpeve-Santu. Ntangu yayi beno me bakula yawu? Ntangu yayi beto ke kota na Buku ya Éphésiens. Ntangu yayi, mutindu mosi, Yandi ke na kutula dibuundu kisika ya lendaka vwanda. Ntangu yayi, Josué tulaka bawu na yinsi ya kimuntu. Ntangu yayi Mpeve-Santu ke na kutula dibuundu, na kisika ya yawu, na kati ya yinsi, yina ya bawu, na kisika ya bawu, difwa ya bawu.

²⁰ Ntangu yayi, kima ya ntete yandi ke banda na yawu awa, yandi ke sonika mukanda ya yandi, “Paul.” Na yina, beto ke mona na mwa ntangu fioti ti mansweki yayi nionso monisamaka na yandi, na seminere ve, na théologien mosi ve, kasi ya vwandaka luzayikisu ya Kinzambi ya Mpeve-Santu yina Nzambi pesaka Paul. Na kuzabaka ti mansweki ya Nzambi, yandi tubaka, yina ba bumbaka kubanda mbatukulu ya yinza, yawu monisamaka na yandi na nzila ya Mpeve-Santu. Mpe Mpeve-Santu na kati ya bantu vwandaka tula konso muntu na ndonga, na kupesaka dibuundu kisika ya yawu.

²¹ Ntangu yayi, kima ya ntete Paul bandaka awa na kutuba na bantu, kele kubika nionso. . . Beno bambuka moyo, yayi kele samu na dibuundu, ya kele samu na bantu ya nganda ve. Ya ke mansweki na bingana samu na yandi, ya lenda bakula yawu ata fioti ve, ya ke luta na zulu ya yintu ya yandi, yandi zaba kima mosi ve samu na yawu. Kasi, samu na dibuundu, ya ke mafuta ya niosi na kati ya ditadi, ya ke kiese yina muntu lenda kuzonzila ve, ya ke kivuvu ya lusakumunu, Ya ke lùngu ya moyo, ya ke kivuvu mpe nsimbisi ya beto, ya ke Ditadi ya Bansungi, oh, ya ke bima nionso ya mbote. Samu zulu na ntoto ke luta, kasi Ndinga ya Nzambi ke luta ata fioti ve.

²² Kasi muntu yina kele na nganda ya Canaan yandi zaba kima ve na yawu, yandi ke na kutambula sika na sika. Mu zola tuba ve ti yandi kele muntu ya mbote ve, mu zola tuba mutindu yina ve. Mu zola tuba ve ti muntu yina ke na Egypte kele muntu ya mbote ve, kasi yandi, kana ya me kuzwa kima yayi ve.

23 Mpe kima yango, ti, nsilulu yina ba pesaka na dibuundu kele ve yinsi ya kimuntu, kasi yinsi ya kimpeve, samu beto kele kimvuka ya banganga-Nzambi ya ntinu, yinsi ya santu. Na yawu na kati ya kimvuka ya banganga-Nzambi yayi ya ntinu, yinsi ya santu, bana ya Nzambi, yina ba me bokila na kubasika, yina ba me soola, yina ba me pona, yina ba me tula na lweka, na yawu yinza ya muvimba kele ya kufwa na nganda. Mpe beto kele ya kutwadisa na Mpeve. Bana-babakala mpe bana-bakento ya Nzambi kele ya kutwadisa na Mpeve ya Nzambi; na muntu ve, kasi na Mpeve.

24 Ya ke na zola, mambu nionso me kangama ntangu yayi. Yayi ba me meka na kulonga yawu bambala mingi, mpe na ntembe ve ti ba-théologien ya nene me kwenda mingi na mudindu kulutila munu. Kasi kima yina mu zola meka ti beno bakula kele yayi, ti muntu yina kele kati na Klisto, na Mpeve-Santu, lenda ndima muntu yina kele na kifu bantangu mingi, yandi ke na ntima ya yinda, muntu ya lutondo, muntu ya mvibudulu. Yandi kele muntu ya lembami, yandi kele ya kukikulumusya, yandi kele ya kwikama, yandi kele ya kufuluka na Mpeve, yandi ke banzaka mambu ya yimbi ve, yandi ke banzaka mambu ya mbote ntangu nionso. Yandi kele muntu ya mutindu yankaka.

25 Yandi ke mutindu muntu yayi ve, “Beto kuzwaka yawu na ntangu mosi. Kana beto me boka, beto me kuzwa yawu, beto ba-Methodiste. Oh, ntangu beto bokaka, beto vwandaka na Yinsi.” Ya ke mbote, ya ke mbote mingi, mu ke kwikila yawu mpe.

26 Na yawu ba-Pentecotiste kwisaka na kutuba na bandinga ya malu-malu, bawu, “Kuzwaka yawu; muntu nionso yina tubaka na bandinga ya malu-malu me kuzwa yawu.” Mu ke kwikila yawu, mpe. Kasi beto me mona ti bantu mingi me kuzwa Yawu ntete ve, beno me mona. Beno me mona? Ntangu yayi ba ke . . .

27 Beto me kuma ntangu yayi na mansweki yayi ya nene yina ba bumbaka kubanda mbandukulu ya yinza mpe ntangu yayi ya me monisama na bilumbu ya nsuka na bana ya Nzambi. Beno ke kwikila ti ya ke ya kieleka, ti bana ya Nzambi me monisama? Ntete beto zonzila konso diambu, beto baka Romain kapu 8 na mwa minuti fioti, beno bika mu tangila beno kima mosi. Beto tala kana yayi me fwanana na yina beto ke na kuzonzila awa. Ntangu yayi beto baka Romain 8, nzila ya 19 ya kapu 8 ya Romain.

Yinza ya muvimba ke na kuingila . . . bivangu ke na kuingila bakumonisama ya bana ya Nzambi.

28 Na bantima ke pela, bivangu nionso ke na kuingila kumonisama. Beno me mona, kumonisama! Yinki kele kumonisama? Kutalisa!

29 Yinza ya muvimba. Ba-Musulman kuna, ba ke na kuingila yawu. Bandambu nionso, bisika nionso, ba ke na kuingila yawu.

“Wapi bantu yango?” Beto kuzwaka . . . Beto me kuzwa kitembo ya nene, beto me kuzwa banzasi mpe bansemo, beto me kuzwa mafuta na menga, beto me kuzwa bima ya mitindu nionso; kasi beto me lembana na kuwa mwa Ndinga yina ya fioti ya lembami yina bendaka profete, yina lwataka kazaka mpe yandi basikaka, yandi tubaka, “Munu yandi yayi, Mfumu.” Beno me mona?

³⁰ Ntangu yayi bivangu nionso ke na kuvumuka mpe ke na kuvingila bakumonisama ya bana ya Nzambi. Ntangu yayi, Paul ke tula ntete dibuundu na kisika yina ya fwana vwanda. Ntangu yayi samu na kubakula yawu, beto tanga yawu diaka.

Paul, ntumwa ya Yesu Klisto na luzolo ya Nzambi, na basantu (ya ke “bantu yina me santisama”) yina kele na Ephèse, mpe . . . bantu ya kwikama kati na Klisto Yesu:

³¹ Ntangu yayi, samu bantu ya munu kuzimbana yawu ve, wapi mutindu beto ke kotaka na Klisto? Beto ke kumaka muntu ya dibuundu samu na kukota na Klisto? Beto ke salaka kisalu mosi samu na kukota kati na Klisto? Ba ke kotisa beto na masa samu na kukota na Klisto? Wapi mutindu beto ke kotaka na Klisto? Ntete ya Corinthiens, kapu 12, “Na nzila ya Mpeve mosi,” mosi, na kisono ya nene M-p-e-v-e, yina kele Mpeve-Santu, “beto me botama kati na Yinsi ya nsilulu.”

³² Na Yinsi yayi ya nsilulu, bima nionso kele ya beto na Yinsi ya nsilulu. Nge me mona yawu, Mpangi Collins? Beno me mona, nionso yina kele na Yinsi ya nsilulu! Ntangu Israel sabukaka Jourdain yayi, bawu kotaka na yinsi ya nsilulu, bawu nwanaka mpe nungaka nionso!

³³ Ntangu yayi beno bambuka moyo, na Yinsi yayi ya nsilulu, ya zola tuba ve ti kimbevo lenda simba beno ve, ya zola tuba ve ti bampasi lenda simba beno ve. Kasi ya zola tuba mutindu yayi, (oh, bika yayi kukota mbote), ya zola tuba mutindu yayi, ti ya kele ya nge! Beno telema kaka mpe beno baka yawu! Beno me mona? Ntangu . . .

³⁴ Mpe, beno bambuka moyo, mutindu mosi kaka Israel zimbisaka muntu mosi, kele ntangu disumu kotaka na camp. Ya ke mutindu mosi kaka beto lenda zimbisa lunungu, ya kele ntangu disumu ke kota na camp, kima mosi ke tambula mbote ve. Ntangu Acan kuyibaka kitini ya wolo mpe lele ya Babylonien yina, disumu kotaka na camp, mpe mvita kusalamaka yimbi.

³⁵ Beno pesa munu dibuundu yayi—yayi na nkokila yayi, kimvuka ya bantu yayi, ya kulunga, ya kulunga kati na nsilulu ya Nzambi, na Mpeve-Santu, yina ke tambula na Mpeve, mu ke tula ntembe na bimbevo nionso to bampasi nionso, to konso kima yina ya kele, ba Joe Lewis kele na kati ya yinsi, na kukondwa ya kwikama ya yandi nionso, mpe mimpani ya yandi nionso yina kele, na kunata bimbevo nionso to bampasi nionso, mpe ba ke vutuka na mavimpi ya kulunga. Yinga, tata. Nzambi pesaka

nsilulu, kaka disumu ya kukondwa lukwikilu lenda kanga yawu nzila. Ntangu yayi beto ke mona yina kele mwa disumu yayi, na manima ya mwa ntangu fioti, ntangu yayi.

. . . yina kele *kati na Klisto Yesu*:

*Lemvo kuvwanda na beno, mpe ngemba, na Nzambi
Tata ya beto, mpe . . . Mfumu Yesu Klisto.*

*Nzambi mpe Tata ya beto Mfumu Yesu Klisto, yina me
sakumuna beto na masakumunu nionso ya kimpeve na
bisika ya mazulu na Klisto, na—na Klisto:*

³⁶ Ntangu beto kele kati na Klisto, beto kele na lusakumunu ya kimpeve. Na nganda ya Klisto, beto kele na ba-sensation. Kati na Klisto beto ke na lusakumunu ya mbote. Lukwikilu ya luvunu ve, nkadulu ya luvunu ve, mambu ya kuyidika ve. Kasi na ntangu nionso beno ke meka na kutuba ti beno kele na Yinsi ya nsilulu, kasi beno kele kuna ve, beno ke kutana na masumu ya beno. Mpe, kima ya ntete beno zaba, beno ke vunama beno mosi mpe—mpe nionso yina, mutindu beto ke tubaka yawu na nzonzolo ya yinza, ya kuyangama. Beno ke mona ti beno kele ve na yina beno ke na kuzonzila. Kasi ntangu beno kele kati na Klisto Yesu, Yandi silaka beno ngemba ya Mazulu, masakumunu ya Mazulu, Mpeve ya Mazulu, bima nionso kele ya beno. Beno kele na Yinsi ya nsilulu mpe ya kufuluka na bima nionso. Amen. Ya ke kitoko! Oh, beto longuka yawu.

Kulandila mutindu yandi me ponaka beto . . .

³⁷ Ntangu yayi, tala yina kele disakuba ya nene samu na dibuundu.

*Kulandila mutindu yandi me ponaka beto kati na
yandi . . . (Na Nani?) Na Klisto.*

³⁸ Beto me mona ntangu yayi, kuna na—na Genese mpe na Apocalypse, Apocalypse 17:8, ti Yandi ponaka beto na Klisto na ntwala ya mbandukulu ya yinza. Ntangu yayi, mpova . . . Beno bika mu tanga yina me landa.

*. . . mbandukulu ya yinza, ti beto vwanda ya santu mpe
ya kuvedila na ntwala ya yandi . . .*

Yandi zabaka beto . . .

³⁹ Ntangu yayi mu zola telema na mpova yayi “ya zabaka na mantwala.” Ntangu yayi, *ya zabaka na mantwala* zola tuba ve, “Mu ke pona Mpangi Neville, mpe mu—mu—mu—mu—mu ke pona ve Mpangi Beeler.” Ya ke mutindu yina ve. Ya ke prescience ya Nzambi yina zabaka nani ke vwanda ya kusungama mpe nani ke vwanda ya kusungama ve. Na yawu, na prescience yango, Nzambi zabaka yina Yandi ke sala, Yandi zabaka na ntwala na nzila ya prescience ya Yandi mambu nionso samu na mbote ya bayina ke zolaka Nzambi, ti Yandi lenda, na nsungi yina ke

kwisa, kuvukisa mambu nionso na Nzutu mosi, ya zola tuba Klisto Yesu.

⁴⁰ Beno bika mu pesa beno mbandu mosi ya fioti awa. Ya ke mbote. Beto ke vutuka na manima, mu banza ti mu zonzilaka yawu fioti na nkokila yina me luta, to mu simbaka diambu yango, na Genese, kapu 1, 1:26, ntangu Nzambi bokilaka Nkumbu ya Yandi, “Mfumu Nzambi,” ya ke na kati ya mpova yayi El, Elah, Elohim, yina zola tuba “yina ke zingaka na Yandi mosi.” Kima mosi vwandaka zinga ve kaka Yandi. Ya vwandaka na mupepe ve, ya vwandaka na nsemo ve, ya vwandaka na bambwetete ve, ya vwandaka na yinza ve, ya vwandaka na kima yankaka ve. Ya vwandaka Nzambi, mpe Nzambi kaka, El, Elah, Elohim. Ntangu yayi, ya ke Yandi yina salaka yawu.

⁴¹ Na kati ya yawu vwandaka bisalu yina zola tuba yina Yandi vwandaka . . . Na kati ya El yayi ya nene, Elah, Elohim vwandaka kisalu to . . . Beno zaba yina *kisalu* kele, to beno bika mu tuba yawu mutindu yayi, ya vwandaka “nkadulu.” Ya ke samu bana kubakula yawu, mpe mu ke mosi ya bana yina fwana bakula yawu kana ba me tuba yawu mutindu yina. Na kati ya Yandi vwandaka nkadulu ya kuvwanda tata, kasi Yandi kele yina zingaka na yandi mosi, ya ke na kima ve samu Yandi kuvwanda Tata. Mpe, ntangu yayi, na kuna na kati vwandaka kima yankaka, ti Yandi vwandaka Nzambi; mpe nzambi kele kima ya kusambila; kasi Yandi vwandaka yina vwandaka zinga na yandi mosi, El, Elah, Elah, Elohim, samu ya vwandaka na kima ve samu na kusambila Yandi. Na kati ya yawu, Yandi vwandaka Mvulusi, mpe ya vwandaka na kima ve samu na kuvulusa. Beno me mona? Na kati ya yawu, Yandi vwandaka Munganga, beno me mona, kasi ya vwandaka na mbevo ve samu na kubelusa, to kima mosi ve vwandaka mbevo. Ntangu yayi beno me mona diambu yango? Na yawu bisalu ya Yandi, nkadulu ya Yandi salaka yina kele bubu yayi.

⁴² Bantu yankaka ke tubaka, “Mbote, samu na yinki Nzambi sukisaka yawu ve na mbandukulu?” “Yandi kele na ntima ya yimbi,” Joe Lewis tubaka, yina fundisaka Joe, to Jack Coe, beno me mona. Yandi tubaka, “Yandi kele kaka na ntima ya yimbi. Nzambi ke vwandaka ve. Kana ya vwandaka, Yandi lendaka vwanda . . .” Oh, munu . . . yandi bokilaka Yandi na bankumbu nionso, beno me mona. Kasi ya ke kaka samu yandi lendaka vwanda na luzabu mingi *awa* na zulu, kasi yandi kele na kima mosi ve *awa* na nsi.

⁴³ Ntangu yayi, ya ke, ya ke kisika yina yawu kele. Beno me mona? Ndinga yayi me tuba yawu awa, mpe Yandi me bumba yawu. Mpe mansweki yayi me bumbama ntangu yayi, beno bambuka moyo, Biblia me tuba, “Kubanda mbatukulu ya yinza, na kuingilaka bakumonisama ya bana ya Nzambi,” samu na kutalisa bawu na dibuundu. Oh, la la! Beno me bakula yawu?

44 Ntangu yayi mu ke sukisa disolo ya munu mwa fioti, to mu ke . . . Mu ke baka dibanza ya munu yina ke landa samu na kubasisa diaka yayi. Beno bambuka moyo, na kati ya bambandu ya Moise, na kati ya bansungi ya baprofete, na kati ya bambandu nionso, ba vwandaka vingila bilumbu yayi ya nsuka samu mambu yayi kutalisama, landila Masonuku. Ya ke mbote, samu ya ke monisama na bana ya Nzambi. Samu na yinki? Kubanda . . . mutindu na pyramide, mutindu mu tubaka yawu, ya ke kuma pene-pene, pene-pene, pene-pene.

45 Mutindu mu ke tubaka diambu yayi mbala na mbala, mpe mu ke tubaka, Nzambi salaka ba-Biblia tatu. Ya ntete, Yandi tulaka Yawu na zulu, zodiake. Beno me monaka yawu ntete? Yinki kele kidimbu ya ntete ya zodiake? Mwense. Yinki kele kidimbu ya nsuka ya zodiake? Leo, nkosi. Yandi kwisaka ntete na mwense, Yandi ke kwisa na mbala ya zole mutindu Nkosi ya dikanda ya Juda. Beno me mona?

46 Yandi salaka yankaka na pyramide kuna na bilumbu ya Enoch, ntangu bawu salaka pyramide. Mpe ba ke tesa yawu. Mu ke bakulaka yawu ve. Kasi bamvita, kisika ba ke tekama mpe ba ke kwenda ya kufukama na mwa kitamina mosi, mpe bawu lenda kutesa kitamina ya bamvita. Beno zaba kisika bawu kele na kitesilu ya bawu ntangu yayi? Ba ke na kati ya kivinga ya ntinu. Mpe mutindu pyramide vwandaka mata . . . Beto lendaka tunga yawu ve, na bima yayi nionso beto ke na yawu bubu yayi. Beto lenda kutunga yawu ve.

47 Ya me tungama kaka mutindu *yayi*, na mutindu ya nsongi. Mpe ditadi yina . . . Ditadi ya nsongi ba monaka yawu ata fioti ve. Ba me tulaka ditadi na nsongi ya pyramide ata fioti ve. Mu zaba ve kana beno zaba yawu to ve, pyramide ya nene ya Egypte, ya ke vwandaka ata fioti ve na ditadi na zulu ya yawu. Samu na yinki? Ditadi ya nsongi kulosamaka, Klisto, Ditadi ya yintu, beno me mona, ya losamaka.

48 Kasi mutindu beto ke mata kubanda na nsungi ya ba-Lutherien, nsungi ya ba-Baptiste, nsungi ya ba-Methodiste, nsungi ya ba-Pentecotiste, beto me kuma na Ditadi ya nsongi ntangu yayi, beno me mona, beto ke na kuvingila mpe beto ke na nsatu ya nene ti Ditadi yina ya nsongi kubaka kisika ya yawu, yinzo kukuma na nsuka. Beno me tangaka ve na kati ya Masonuku, "Ditadi yina ba losaka"? Mpamba ve, beto me mona ti ya vwandaka zonzila tempelo ya Salomon. "Kasi Ditadi yina ba losaka me kuma Ditadi ya kulutula mfunu yina ke na kusimba yinzo." Mpe mu ke tuba yayi kaka samu beno bakula mbote-mbote.

49 Ntangu yayi, mpe na kati ya Biblia, beto ke na kuzinga na kilumbu ya nsuka, na nsongi ya pyramide, bambisi yina me kutana ya nsungi ya cancer na kati ya zodiake, na ntangu ya kwizulu ya Leo, nkosi, na ditadi yina ya nsongi, mpe na bilumbu

ya bakumonisama ya bana ya Nzambi, na kati ya Biblia, beno me mona. Beno me mona kisika beto kele? Beto me kuma na ntangu ya nsuka.

⁵⁰ Bantu yikwa me kutanga zulunale na lumingu yayi, yina Khrushchev na bayankaka me tuba? Oh, ba me kubama; beto mpe. Amen. Ya kukubama! Ya ke mbote mingi, beno me mona. Oh, yinki—yinki—yinki ntangu yayi ya mbote, yinki ntangu yayi ya mbote! Kana Baklisto lendaka bakula kaka kilumbu yina beto ke na kuzinga. Oh, la la!

⁵¹ Yinki beno ke banza samu na yawu? Musoniki ya Buku yayi, yina monaka yawu, mpe ya monaka ti ya ke monisama na bilumbu ya nsuka, ke vingila mpe ke vumuka samu ti bana yayi ya Nzambi kutelema na bilumbu ya nsuka, na ngolo ya Mpeve-Santu na nsungi ya nsuka, samu na kumonisa bima yina ba bumbaka na kinsweki kubanda mbatukulu ya yinza, kutalisa yawu.

⁵² Ntangu yayi beto vutuka na “mbatukulu ya yinza” diaka, samu na kubaka luzayikisu, samu na kumona kana beto kele ya kusungama to ve. Mu banza ti mu ke finga ve kana mu ke bokila Nzambi, “Tata,” kasi mu zola tuba yawu samu beno bakula yawu. Tata! Tata zolaka kuvwanda na bana, na yawu yinki Yandi salaka? Yandi tubaka, “Bika ti Bawanzio kuvwanda.” Mpe bawu kwisaka pene-pene ya Yandi. Oh, ya ke mbote. Ba kembilaka Yandi, na yawu Yandi vwandaka Nzambi, bisalu. Beno bambuka moyo, Yandi vwandaka El (E-l), Elah, Elohim, yina ke zingaka na yandi mosi, kima mosi ve kasi Yandi kaka. Ntete Bawanzio kwisaka. Na ntangu, Bawanzio lendaka kaka kukembila. Bawu lendaka kuzimbana ve. Na yawu, Bawu lendaka kubela ve, Bawu vwandaka bivangu yina lendaka kufwa ve. Na yawu, Yandi lendaka talisa ve ngolo ya Yandi ya kubeluka ya nzutu, Yandi lendaka talisa ve mpulusu ya Yandi. Na yina, na ntwala, ntangu yayi bika. . .

⁵³ Na yawu na manima ya yina, Yandi tubaka, “Beto ke sala kima yina ba lenda kusimba.” Na yawu Yandi salaka ntoto. Mpe ntangu Yandi salaka ntoto, Yandi salaka bivangu nionso ya ntoto, na manima Yandi salaka muntu. Bima nionso yina basikaka na zulu ya ntoto; kubanda na ndumbu to meduse, yina ke kaka mwa mutindu ya nsuni ke na kutambula na zulu ya masa, ya bandaka kuna, na. . . kubanda na yina tii na kisyoto, yina kele mutindu ya luzingu ya nsi mingi yina beto lenda mona, ya zola tuba, kisyoto. Mutindu ya zulu mingi kele muntu. Ya bandaka na kisyoto tii na mbalambongo, na manima ya mbalambongo ya landilaka mpe landilaka mpe landilaka, mpe ntangu nionso Mpeve-Santu bandaka na “whuuuh,” kutula mupepe, luzingu kwisaka diaka; “whuuuh,” luzingu ya kulutila nene. Mpe kima ya ntete, yina vwandaka na kifwani ya Nzambi, ya vwandaka muntu. Kima mosi vwandaka ve, ata fioti ve na

ntangu me luta, ya ke vwanda diaka ata fioti ve na kivangu mosi, kulutila muntu, samu muntu kele na kifwani ya Nzambi. Beno me mona? Na yawu muntu. . .

⁵⁴ Ntangu Yandi salaka muntu ya Yandi ya ntete. Ntangu yayi, ntangu Yandi salaka bivangu ya Yandi Bawanzio. . . Yandi salaka muntu, “Yandi salaka bawu bakala na kento,” kisika mosi. Yandi vwandaka na mbala mosi bakala mpe kento, bukento na bubakala. Ntangu Yandi salaka Adam mpe tulaka yandi na kati ya nzutu. . . beno bambuka moyo na Genese 1, Yandi salaka bakala na kento. Mpe na Genese 2, ya vwandaka na muntu ve samu na kubundula ntoto, muntu ya nsuni. Ya vwandaka na muntu ve samu na kusimba kima mosi mpe kubundula ntoto, tii kuna ya vwandaka na muntu mosi na kifwani ya Yandi. “Mpe Nzambi kele. . .” [Dibuundu me tuba, “Mpeve”—Mu.]. Ya ke mbote. Beno me mona? Yandi salaka muntu ya ntete, “bakala mpe kento Yandi salaka bawu.” Ntangu yayi, ntangu Yandi salaka muntu ya ntete!

⁵⁵ Ntangu yayi, beno bambuka moyo, Ya vwandaka na nionso yina na kati ya dibanza ya Yandi. Mpe na Lumingu na nkokila mu zonzilaka yawu. Ndinga kele dibanza yina me tubama. Nzambi banzaka mutindu Yandi lendaka vwanda Nzambi, mutindu ba lendaka sambila Yandi, mutindu Yandi lendaka vwanda Munganga, mutindu Yandi lendaka vwanda Mvulusi; mpe kaka na ntangu Yandi tubaka Ndinga, ya salamaka kimakulu. Oh, kana bana yayi ya Nzambi ntangu yayi lenda simba kaka Ndinga yayi mutindu yina. Ntangu Nzambi ke tuba Ndinga, ya ke salama! Ya kieleka! Ya lendaka vingila. . . Chronologie me tuba yawu, to archéologue mpe nionso yina, ba ke tubaka ti mbala yankaka ya lombaka mafuku na mafuku na mafuku ya bamvula. Mu zaba ve, ya lendaka vwanda mafunda ya mafuku na mafunda ya mafuku ya bamvula. Mu zaba ve ya bakaka bamvula yikwa. Nzambi ke zingaka ve na kati ya ntangu. Ya ke bikala diaka ve na muniti mosi na nsi ti na ntangu yina Yandi salaka yawu ntangu Yandi tubaka yawu. Yandi kele kaka Nzambi. Na Yandi ntangu ke vwandaka ve.

⁵⁶ Mu zabaka yawu mutindu yina ve na ntwala ya mpimpa yina, to, na suka yina. Ya kukonda nsuka, mazono ve, mbasi ve, nionso ke kaka na ntangu yayi. Beno me bakulaka ntete mpova yayi “MU KELE”? Ya kele ve “Mu vwandaka” to “Mu ke vwanda.” Ya ke ya Kukonda nsuka, “MU KELE!” Beno me mona, “MU KELE,” ntangu nionso!

⁵⁷ Ntangu yayi, kasi Yandi zolaka kutula bima kati na ntangu. Yandi zolaka kusala kima yina ke kembila, na bisalu ya Yandi salaka yawu. Na yawu Yandi salaka muntu. Na yawu, na kati ya muntu yayi, ya monana ti yandi vwandaka yandi mosi. Na yawu, ntangu yayi, samu na katalisa ntangu yayi dibanza ya Yandi ya nene, kifwani yina Yandi vwandaka na yawu ya Klisto

na Dibuundu, Yandi bakaka ve kitini yankaka ya ntoto mpe salaka kento, kasi Yandi bakaka lumpanzi, na lweka ya Adam; mpe bakaka na mpeve ya Adam, bukento, mpe tulaka yawu na kati ya lumpanzi. Kana beno me mona bakala mosi ke sala mambu mutindu bakala-kento, kima mosi ke tambula mbote ve. Kana ntangu beno me mona kento mosi yina ke zolaka kusala mambu mutindu bakala, kima mosi ke tambula mbote ve. Beno me mona, kima mosi ke tambula mbote ve. Ya ke bampeve zole ya luswaswanu, na mutindu nionso. Kasi, kintwadi, ba ke vukana, “zole yayi kele mosi.” Na yawu Yandi salaka kento na bakala, mpe ba lendaka kununa ata fioti ve, ba lendaka kufwa ata fioti ve, ba lendaka vwandaka na bansuki ya mpembe ve, ata fioti ve. Ba vwandaka kudia, kunwa, kulala, kaka mutindu mosi na beto, kasi bawu zabaka ata fioti ve yina disumu vwandaka.

⁵⁸ Ntangu yayi mu ke bika yawu, beto ke zonzila yawu na ntangu yankaka na dilongi yankaka, na nkuna ya nioka. Ya ke, ba lombaka munu na kukatula yawu. Kasi muntu mosi kukwisa samu na kutuba na munu diambu ya luswaswanu. Yawu yina mu zola zaba, beno me mona.

⁵⁹ Ntangu yayi, kasi na yina na manima ya nionso yayi, na ntangu disumu kukotaka, yinki salamaka?

⁶⁰ Kuna na zulu, na zulu, difuku mosi, mafuku nkama mosi ya bakilometele, ya ke na kitamina mosi ya nene mutindu *yayi*, mpe ya ke zola ya kulunga agapao. Konso ntangu beno ke tambula mutindu *yayi*, ya ke fiotuka na kitamina ya fioti mingi. Mpe beno ke mona mutindu ya kuma fioti ntangu ya ke kuma na ntoto. Ya ke kivudi ya kivudi ya bivudi. Yawu yina beno ke na yawu, yawu yina mu ke na yawu, kivudi ya kivudi ya bivudi ya zola agapao.

⁶¹ Ya ke na kima mosi na kati ya beno, ya ke na kima mosi na kati ya konso kento awa yina ke na bamvula kulutula makumi zole, ya ke na kima mosi na kati ya konso bakala awa yina ke na bamvula kulutula makumi zole, yina ke sala ti ya vwanda ntangu ya yinda. Beno ke kaka na bamvula tanu, ya ke kubanda bamvula kumi na tanu tii na makumi zole. Na manima ya bamvula makumi zole beno ke banda na kufwa. Kasi, kubanda mvula kumi na tanu, beno ke kaka mwana ya ngunza. Na yawu beno ke kula tii na ntangu beno ke kuma na bamvula makumi zole. Mpe na manima ya bamvula makumi zole, oh, beno ke tuba, “Mu ke kaka bakala ya mavimpi ya mbote.” Beno ke tuba kaka mutindu yina, kasi beno ke mutindu yina ve. Beno ke kufwa mpe beno ke na kufwa mpe beno ke na kubeba, ata ti beno me sala konso kima yina. Nzambi me nata beno tii na bamvula yina, kasi beno ke kufwa kaka. Ntangu yayi yinki ke salama? Ntangu beno ke banda kaka na kufwa, kasi kuna na kati ya beno ya ke na kima mosi ke tuba, “Mu zola vwanda diaka na bamvula kumi na nana.”

⁶² Ntangu yayi mu zola kuyufula beno kima mosi. Yinki ke

salama kana beno butukaka kubanda bamvula nkama tanu me luta, mpe beno me bikala na luzingu na bamvula kumi na nana tii bubu yayi? Beno zolaka vwanda muntu ya mambu ya ntama, na mabanza ya beno ya bamvula nkama tanu me luta! Na ntuala batata bizieti kukwisa awa, mpe beno vwandaka kento ya ntwenia na dibanza ya mutindu yina. Mpamba ve, beno zolaka vwanda na kisika ya mbote kana beno me kuma mbuta mpe beno me zinga bamvula nkama tanu. Beno me mona, ya ke na kima mosi ke tambula mbote ve.

⁶³ Beno ke tuba, “Mbote, ntangu yayi mu me kuwa mwa mbote, Mpangi Branham. Oh, mu ke—mu ke—mu ke na bamvula kumi na nana, mu ke na bamvula kumi na sambanu, mu kuwa mbote.” Cherie, bika mu tuba na nge kima mosi. Yinki ke tuba na nge ti mama ya nge kele ya moyo na minuti yayi, kana yandi kele ve na dibuundu yayi? Yinki ke tuba na nge ti nkundi ya nge ya bakala ba me kufwa yandi ve na mwa ntangu fioti me luta, to nkundi ya nge ya kento? Yinki ke tuba na nge ti na suka nge ke vwanda mvumbi na yinzo ya nge? Yinki ke tuba na nge ti nge ke basika na yinzo-Nzambi yayi na nkokila yayi, ya moyo? Ba lenda tula kivuvu na yawu ve. Ba lenda tula kivuvu na kima mosi ve. Kana nge ke na bamvula kumi na tanu, kumi na zole, kumi na yivwa, makumi sambwadi na nana, to makumi yivwa, ya ke . . . nionso kele kivuvu ve. Beno me zaba ve kisika beno me telema. Kasi beno zola vutuka na bamvula kumi na tanu, kumi na nana. Yinki ke sala ti beno sala mutindu yina?

⁶⁴ Ntangu yayi, kana beno vutuka na bamvula kumi na nana mpe beno bikala mutindu yina, mpe beno ke vwanda mbevo ata fioti ve mpe beno vwanda ata fioti ve. . . beno fwana vwanda na bantu yankaka, kana ve beno ke zimbisa yawu na ntangu beno ke nuna, beno me mona. Bantu ke landila kaka na kuzinga na bambandu yankaka mpe beno ke vwanda muntu ya ntama. Beno ke vwanda na kisika ya yimbi mingi kulutila mutindu beno lendaka nuna na bawu. Kasi ya ke na kima mosi yina ke na nsatu ya yawu kuna. Ya ke agapao ya fioti, mwa kivudi yina ke sala ti beno. . . Ya ke na kima mosi na zulu awa.

⁶⁵ Ntangu yayi, na mpimpa yina, to na suka yina, na ngunga ya sambwadi, ntangu Mpeve-Santu, na mambote ya Yandi mpe lemvo ya Yandi, bakaka munu na nzutu yayi, mu ke kwikila yawu, mu ke kwikila yawu. Yinga to ve, mu ke tuba yawu ve, mpe mu kotaka na yinsi yina mpe mu monaka bantu yina, mpe ba vwandaka bawu nionso bantwenia. Mpe mu monaka bantu ya kitoko mingi mu me monaka ntete ve na luzingu ya munu. Mpe Yandi tubaka na munu, “Bayankaka vwandaka na bamvula makumi yivwa. Ba ke bandimi ya nge. Kuyituka ve ti ba ke na kuboka, ‘Mpangi ya munu! Mpangi ya munu!’”

⁶⁶ Ntangu yayi, ya ke nzutu ya mazulu, mpe na ntangu beto ke kufwa, beto ke kuma disolo ya luvunu ve, beto ke kuma nzutu

mosi. Kana beto, beto nionso, kufwa, kana bombe atomique kubebisa beto na muniti mosi, na minuti tanu ke landa beto ke vwanda kuna ke pesana mbote bamosi na bayankaka mpe kuyambana bamosi na bayankaka, mpe kuboka mpe ke sepela, mpe ke kembisa Nzambi! Yinga, tata. Mpe Mpangi-bakala mpe Mpangi-kento Spencer yina ke ya kuvwanda awa, mu banza ti ba ke bankwelani ya kulutila kiboba awa, ba ke vwanda na bamvula kumi na nana, bamvula makumi zole. Mpangi Neville ke vwanda mwana-bakala ya ntwenia, mpe mu ke vwanda mwana ya ntwenia. Mpe beto nionso ke vwanda. . . Ya ke kaka ya Kieleka. “Kana tenta yayi wapi beno ke na kuzinga me beba, beto ke dezia na yankaka ke na kuingila.”

⁶⁷ Ntangu mwa bébé mosi me basika na mama ya yandi, na lubutuku ya bantu nionso, nzutu ya yandi ke ningaka mpe makulu ke ningana-ningana, mpe nionso yina. Beno lemvokila munu samu na nzonzolo yayi, beno bamama ya bantwenia. Kasi, ntangu yina, ya ke luzingu na kati ya misisa yina ke sala ti ya ningana. Kasi ntangu ya ke kwisa na zulu ya ntoto, kima ya ntete, ya ke kuzwa pema ya yandi, mpe nkadulu ya nzutu ya kimpeve ke kota na bébé na ntangu yina. Beno bika yandi, ya ke baka mwa yintu ya yandi mpe ya ke kangama na dibeke ya mama ya yandi mpe ya ke banda na kunwa. Kana ya sala mutindu yina ve, ata miliki ke kwisa ve.

⁶⁸ Beno me monaka ntete mwana ya ngombe ntangu ya me butuka, ya. . . kana ya me baka kikesa samu na kutelema mbote-mbote? Nani ke tuba na yandi? Ya ke kwenda mbala mosi na mama ya yandi, ya ke banda na kupusana mpe ke banda na kunwa. Oh, yinga!

⁶⁹ Mpamba ve, ntangu nzutu yayi ya nsuni me kwisa awa, ya ke na nzutu ya kimpeve yina me kubama samu na yawu. Mpe kana yayi. . . Oh, alléluia! “Mpe kana tenta yayi wapi beto ke na kuzinga me kubeba, ya ke na yankaka ke na kuingila kuna.” Kaka na ntangu beto ke basika na nzutu yayi, beto ke kota na yina; yina ke lombaka ve na kunwa masa ya madidi, yina ke na nsatu ya kunwa masa ve; yina ke kudiaka ve, ba me salaka yawu ve na mbombi ya ntoto. Kasi ya ke ya kieleka, mpe ya lenda simba mpe ya lenda pesa mbote, mpe kuzolana kaka mpe nionso kele ya kulunga. Mpe nzutu yina ke na kuingila kuna. Ya ke kitini ya yawu. Ya kele tatu.

⁷⁰ Beno ke banda Luzingu ya beno ya Kukonda nsuka kaka awa na autel. Beno ke banda Seko ya beno awa. Oh! Beno ke banda Luzingu ya Kukonda nsuka kaka awa. Na yawu beno me butuka diaka, mwana ya Nzambi. Na yawu ntangu beno ke kufwa, beno ke banda. . . Ntangu lufwa ke bula beno na nzutu yayi mpe ntima ke bula diaka ve, mpe bapiné ya luzingu yayi ke kufwa ke banda na kutambula diaka ve, mwa kivudi yina vwandaka kivudi ya kivudi, na sekonde mosi ya ke kuma kivudi ya kivudi, na manima

ya ke kuma kivudi, na manima ya kuma mwa filé, na manima ya ke kuma mwa masa ya fioti, na manima ya ke kuma nzadi mosi, mpe na manima ya ke kuma mubu, mpe na manima ya mwa ntangu fioti beno ke telema kuna na ntwala ya bankundi ya beno ya luzolo, beno me lwata bilele ya nzutu ya mazulu, yina beno ke zabana mosi na yankaka, beno ke zolana mosi na yankaka, beno ke vutuka diaka ntwenia ya bakala mpe ntwenia ya kento. Ya kieleka kaka. Ya ke vingila kuna tii na kwizulu ya Mfumu Yesu. Mpe kilumbu mosi nzutu yina ya nkembo ya Yandi. . . . Ntangu yayi beno bambuka moyo, yayi ke nzutu ya mazulu, ya nkembo ve, nzutu ya mazulu. Mpe kilumbu mosi nzutu yina ya mazulu ke katuka na Zulu na Yesu.

⁷¹ “Tala yina mu ke zonza na beno,” Thessalonicien ya Zole, kapu 5, to Thessalonicien ya Ntete, kapu 5, mosi to yankaka, “Mu ke tuba na beno, mu zola ti beno zaba kieleka, bampangi, na yina me tadila bantu ya kufwa, samu beno vwanda ve na kiadi, mutindu bantu yankaka bayina kele ve na kivuvu. Kana beto ke na kukwikila ti Klisto kufwaka mpe vumbukaka na lufwa na kilumbu ya tatu, Nzambi ke nata na sika ya yandi kintwadi na Klisto bayina kufwaka na kukwikila Yandi. Beno kuwa mutindu beto ke na kuzabisa landila misiku ya Mfumu, ti beto yina ke vwanda ya moyo mpe ke bikala tii na kwizulu ya Mfumu, beto ke vwanda ve na mantwala to ke pekisa ve” (nzonzolo ya kulutila kitoko) “ke pekisa ve bayina kufwaka. Samu mpungi ya Mfumu ke bula, mpe bayina kufwaka na lukwikilu kati na Klisto ke vumbuka ntete na lufwa.” Banzutu yayi ya mazulu ke kulumuka mpe ke lwata banzutu ya ntoto, banzutu ya nkembo. “Mpe beto yina kele ya moyo mpe me bikala beto ke soba na mpamukunu, na mutindu ya mbwetelo ya meso, mpe beto nionso kintwadi ke zanguka na bawu, samu na kukutana na Mfumu na mupepe.”

⁷² “Mu ke kunwa diaka ve mbuma ya vinu mpe mu ke kudia yawu diaka ve tii kuna Mu ke kunwa yawu ya malu-malu kintwadi na beno na kati ya Kimfumu ya Tata ya Munu,” Mukembo ya Makwela. Samu bamvula tatu na ndambu mbeni ya Klisto ke manisa luyalu ya yandi, ba me bebisa yinza ya muvimba, ba me bokila ba-Juif, Joseph ke kukitalisa na Bantu ya makanda, to na ba-Juif. Beno bambuka moyo, ntangu Joseph kukitalisaka na bampangi ya yandi, ya vwandaka na Muntu mosi ve ya makanda kuna. Ntangu yandi tindaka. . . . Beno zaba disolo yango. Joseph, kifwani ya kulunga ya Klisto, na mutindu nionso. Mpe ntangu Joseph bokilaka bampangi ya yandi, mpe bawu kwisaka kuna, mpe yandi talaka mpe yandi monaka Benjamin ya leke, mpe yandi monaka bawu kuna mpe na yawu yandi. . . . Bawu tubaka, “Beno tala, muntu yayi! Beto—beto zolaka ve kufwa mpangi ya beto ya bakala, Joseph.” Ba-Juif ke na kumona ti bawu salaka kifu; na ntangu Klisto, ntangu Yandi ke na kukitalisa Yandi mosi na bawu. Mpe Joseph lendaka kukanga ntima ve, yandi dilaka, mingi, yandi basisaka kento ya yandi na

hana ya yandi, na bankengi nionso mpe nionso yina, mpe tindaka bawu na yinzo ya kimfumu. Ya kieleka kaka. Na yawu na ntangu ya vwanaka kaka na ntwala ya ba-Juif, yandi tubaka, “Mu ke Joseph, mpangi ya beno ya bakala. Mu ke mpangi ya beno ya bakala.” Na yawu bawu kubwaka mpe bandaka na kutekita, bawu tubaka, “Ntangu yayi beto zaba ti beto me suka, samu beto kufwaka mpangi ya beto ya bakala. Beto tubaka ti beto kufwaka mpangi ya beto ya bakala, mpe ntangu yayi yandi me kuma ntinu ya nene.”

⁷³ Yandi tubaka, “Nzambi salaka yawu samu na diambu mosi, kuvulusa luzingu.” Yawu yina kikuma Nzambi salaka yawu, samu na kuvulusa beto Bantu ya makanda. Kasi Bantu ya makanda vwanaka na kati ya yinzo ya kimfumu. Alleluia! Samu ba losaka Yandi na bampangi ya yandi, Joseph, Yandi bakaka Kento ya makwela; mpe Kento yango ya makwela vwanaka Muntu ya makanda, Juif ve. Mbote mingi.

⁷⁴ Ntangu yayi, wapi beno ke kwenda ntangu yayi? Na manima ya kulwata nzutu yayi ya nkembo, mpe nsungi yayi ya nene ke kwisa; ntangu nzutu yayi ya nkembo, nzutu yayi ya mazulu ke soba na nzutu ya nkembo. Beno ke bakula yina mu zola tuba? Na yawu mu lenda kwisa kuna mpe kutuba, “Mpangi Neville!” Mu ke pesa beno mwa kifwanukusu. Mu ke tuba, “Mpangi Humes, beto kwenda tala Tata na suka yayi.” Yandi kele Nzambi. Beto me zaba Yandi ntangu yayi, Yandi kele Mvulusi, Yandi kele Munganga.

⁷⁵ Ya vwanaka ata fioti ve na kivangu ya disumu. Ya me kota mbote ve, mutindu yina ve? Disumu kele kivangu ve. Ve, tata! Disumu kele kubeba. Ya ke kaka na Ngangi mosi, ya kele Nzambi. Disumu kele kubeba ya mambote. Yinki kele kinsuza? Kubeba ya yina kele ya kusungama. Yinki kele luvunu? Kieleka ba me lakisa na mutindu ya yimbi. Ya kieleka. Yinki yayi nsingulu? Ya ke masakumunu ya Nzambi ba me soba na nsingulu, na kisika ya vwanaka lusakumunu ya Nzambi. Disumu kele kivangu ve. Disumu kele kubeba. Na yawu, Satana lendaka vanga disumu ve, yandi bebisaka kaka yina Nzambi vangaka. Ya kele kaka kieleka. Lufwa kele kaka kubeba ya luzingu.

⁷⁶ Ntangu yayi beno tala mbote, beno tala mbote. Na yawu mu ke kwenda kuna, mpe mu ke tuba, “Mpangi Humes, nge na munu, na Mpangi Beeler mpe bampangi yankaka, beto ke kwenda tala Tata, Nzambi. Mpe, tala, beto sala mwa nzietelo. Bankundi beno ke zolaka miongo ntangu beno. . . .”

“Yinga, ya kieleka.”

⁷⁷ “Oh, ya ke na mafuku zole to tatu ya bitamina kuna na yinza yina ya malu-malu. Beno kwenda, beno tambula yawu.”

⁷⁸ “Mu fwana. . . ? . . . mwini bilumbu nionso, beno kwisa na zulu mingi. Mu ke kuwa beno. Na ntwala ba ke manisa na kutuba, mu ke kuwa.” Esaie 66. Ya kieleka.

⁷⁹ Mpe beno zaba, mu ke tambulaka kuna na makulu, beto nionso ke tambula kuna na makulu pene ya bamvula nkama tanu, kaka mwa nzietelo ya fioti, difuku mosi ya bamvula, ya ke sala luswaswanu mosi ve, beno me mona. Mpe ntangu yayi—ntangu yayi ya ke monana buzoba, kasi ya ke kieleka. Beno me mona, ya ke kieleka, samu ya ke na ntangu ve, ya ke Seko. Mpe ntangu mu ke kwenda kuna, mu ke tambula na makulu kuna, mpe beno zaba nani mu—mu—mu ke kutana na yandi kuna? Mu ke tuba, “Mbote, yina Mpangi-kento Georgie Bruce! Mpamba ve, Mpangi-kento Georgie, mu me monaka nge ntama.” Ya ke kaka mutindu mosi. Beno me mona? Yandi lendaka vwanda na mafuku kumi ya bamvula, kasi yandi ke kaka ntwenia mutindu ya vwandaka. Yandi ke vwanda kuna ke kwanga mukongo ya muntu mosi, mpe mu ke tala kuna, ya ke cheetah, nkosi.

Mu ke tuba, “Yinki mutindu na suka yayi, cheetah?”

⁸⁰ “Miawu,” mutindu mwana ya niawu. “Oh, mu vwandaka solula kuna na bampangi yankaka ya bakento pene-pene ya bafelele yina ya nene, beto vwandaka kuna pene ya bamvula nkama tanu, beno me mona, na kutala bawu.” Ntangu yayi, ya ke monana buzoba, kasi ya ke kieleka. Ya kieleka. Yawu yina dibanza ya Nzambi.

⁸¹ Mbote, ntima ya nge kusakumuka, Mpangi-kento Georgie. Ya ke na kigonsa mosi ve, kima mosi ve. Na nkokila beto ke kwenda kuna na zulu ya mongo, mpe beto ke tuba, “O Tata, Nzambi, kilumbu mosi mu zimbanaka. Oh, kilumbu mosi mu vwandaka na poto-poto ya masumu, Tata, Nzambi, mpe Nge vulusaka munu.”

⁸² Mpamba ve, bantu yina mekaka na kutuba mutindu yina kumaka bilawu. Mbote, muntu yina sonikaka nzila yina ya nsuka ya *O Zola Ya Nzambi*, yina ba sonikaka na zulu ya kibaka ya lupitalu ya bilawu, yina mekaka na kuzonzila zola ya Nzambi. Yandi kukikulumusaka samu na kuvulusa bansumuki, mpe Yandi salaka yawu, zola ya Yandi yina kwisaka vulusa nge na munu. Beno zonzila kukembisa, Bawanzio kuzaba yawu ve! Kukembisa, Wanzio kuzaba kaka . . . Yandi ke telama kuna mpe ke nata mapapu ya Yandi na ntwala mpe na manima, mpe ndambu na ndambu, “Alleluia! Alleluia!” Kasi, oh, mawa! Kana ya me kuma ntangu ya kuzaba ti mu zimbanaka mpe ntangu yayi ba me kuzwa munu, munu kufwaka, mu me vutuka diaka na luzingu! O Nzambi, mu vwandaka disumu, mu vwandaka mvindu, mpe mu vwandaka na kati ya fulu!

⁸³ Tala kima ya kulutila kitoko yina luzingu yayi lendaka pesa beno. Beno me kwendaka ntete awa na fulu ya Colgate? Ya ke kisika ya nsunga ya mikolobo ya kulutila yimbi mu me monaka ntete ve. Nsunga yina ya ntama ya midinga ke pesaka munu kimbevo. Ya kutandama kuna na kati ya midinga yina ya ntama, ya kubela mingi na kivumu ya beno, ya ke baluka kuna na kati,

na manima kubaka mafuta ya ricin. Beno me mona, ya kubela mingi! Mpe bampuku ke mata na zulu ya beno, ke meka na kudia beno. Mpe yina ke luzingu na mambu ya yawu ya kulutila mbote. Na manima muntu ke kwisa simba beno mpe ke telemisa beno. Mpe beno kele kiboba kieleka mpe beno lenda kukisadisa ve beno mosi. Mpe yandi lokota beno mpe yandi soba beno na mwana-bakala mosi ya bamvula kumi na nana, yandi tula beno na zulu ya mongo, na mavimpi ya kitoko, oh, na mupepe ya kitoko mutindu yina, na masa ya madidi ya mbote. Beno ke zola diaka kuvutuka na fulu yina? Ata fioti ve, ata fioti ve, ata fioti ve, ata fioti ve beno ke vutuka diaka na fulu yina.

⁸⁴ Ntangu yayi, ya zola tuba mutindu yina, bankundi. Tala yina vwandaka na vision yina, to na nsobolo yayi, nionso yina, vision mosi. Mu zola tuba vision, samu mu ke na boma ti muntu mosi kunionga kana mu tuba nsobolo, yawu yina ya vwandaka. Ntangu yayi, ya ke ntangu Nzambi. . . yina Nzambi salaka samu na kunata bana-babakala na bana-bakento na Yandi. Ntangu yayi, bantu yayi kele banani? Yinki mutindu ata fioti ve ba. . . Yinki bantu yayi salaka samu na kuzwa yayi? Yinki mutindu bawu salaka? Nzambi, na mbatukulu, na ntwala Wanzio mosi kusalama. . . Bantu yikwa kuzaba ti Yandi kele ya seko? Kana Yandi ke mutindu yina ve, Yandi kele Nzambi ve. Na yawu, Nzambi, na mawa ya Yandi ya seko, Yandi monaka ti Lucifer ke sala yawu, kana Yandi vangaka yandi. Yandi zolaka tula bawu na nsi ya kimpwanza ya kusoola, na kisika yina. Mpe beno kele kaka kuna, ya kieleka, yintu ya mbote na yimbi kele na ntwala beto nionso, beno sala nsodolo ya beno. Mpe Lucifer vwandaka ya ntete na kubaka nzila ya yimbi. Mpe yandi bandaka na kusala mambu ya yandi, muntu ya kindiafu, ke meka na kubaka nionso samu na yandi mosi, ya ke meka na kuyala muntu yankaka. Mpe ya bandaka kuna. Ntangu yayi, beno kuwa yayi. Ya ke kisika yina disumu bandaka. Nzambi, na dibanza ya Yandi ya seko, monaka yawu, mpe monaka nzila mosi kaka. . .

⁸⁵ Ntangu yayi, beno bampangi ya ba-trinitaire, mu zola kuniongisa beno ve, kasi wapi mutindu na Nkumbu ya Ndinga ya mbote ya Nzambi beno lendaka kuma na kusala Yesu muntu yankaka na kisika ya Nzambi Yandi mosi? Kana Yesu lendaka baka muntu yankaka mpe kusala ti yandi kwenda kufwa, samu na kukuula muntu yayi awa, Yandi zolaka vwanda ya kusungama ve. Ya ke na mutindu mosi kaka samu na Nzambi na kusala yawu, ya ke kaka kubaka Yandi mosi kisika yango! Mpe Nzambi kumaka muntu ti Yandi lenda kuwa bampasi ya lufwa, samu na kukatula beto na ntunga mpe na lufwa, ti beto lenda kukuulama na Yandi Mosi. Yawu yina ba ke kembila Yandi mingi. Yesu vwandaka muntu, ya kieleka Yandi vwandaka muntu. Yandi butukaka muntu, m-u-n-t-u, yina butukaka na mwense Marie. Kasi Mpeve yina vwandaka na kati ya yandi vwandaka Nzambi kukondwa kitezo,

na Yandi vwandaka muvimba ya Bunzambi kati na nzutu. Yandi vwandaka Yehowa-yile, Yandi vwandaka Yehowa-rafa, Yandi vwandaka Yehowa-manassé, Yandi vwandaka Yehowa; Kinwanunu ya beto, Kinwanunu ya beto ya kisengo yina ke bumbaka nzutu, Munganga ya beto; Yandi vwandaka Alpha, Omega, Mbatukulu mpe Nsuka; Yandi vwandaka ya Ntete, ya Nsuka; Yandi Vwandaka, Yina Kele, mpe Yina ke Kwisa; Musisa mpe Nkuna ya David, Mbwetete ya Suka, oh, Yandi vwandaka Nionso na nionso. Na Yandi vwandaka muvimba ya Bunzambi kati na nzutu!

⁸⁶ Mpe lufwa vwandaka ntangu nionso na ntunga, yina vwandaka tobula bantu, “Ah,” diabulu ke tuba, “Mu me kanga nge, samu nge me kuwa munu. Mu ke tobula nge, mu ke tula nge na kati ya ntoni. Menga yina ya mameme lendaka sadisa beno ve, ya ke kaka menga ya niama.” Kasi Nzambi, na ndwenga ya yandi, zabaka ti Mwana-dimeme ke kwisa, yina kufwaka kubanda mbatukulu ya yinza. Yinga, tata. Mpe bawu. . . Yandi vingilaka ntangu yina, samu ntangu ya muvimba kulunga.

⁸⁷ Kasi kilumbu mosi ntangu Mwana-dimeme yayi kwisaka, Muntu yayi, Satana vunamaka yandi mosi. Yandi talaka na lweka ya Yandi, yandi tubaka, “Kana Nge kele Mwana ya Nzambi, sala *yayi*. Kana Nge ke Mwana ya Nzambi, sala kimangu mosi mpe mu mona Nge kusala yawu. Mu zola mona Nge kusala yawu. Uh-huh, Mu ke fika kizizi ya Yandi, mu ke bula Nge. Kana Nge ke profete, tuba na beto nani me bula Nge.” Hum! “Mu ke kwikila ve, mu ke kwikila ve ti Nge ke Muntu yango. Kana ya kele Nge, tuba na beto mbala mosi ti ya kele Nge.” Beno me mona, nionso mutindu yina. “Oh, tuba na beto ti ya kele Nge!” Yandi fungulaka ve yinwa ya Yandi. Oh, oh, tala Yandi ke na kuvuna!

⁸⁸ Ya talaka kilandi ya Yandi, mpe tubaka, “Mu lenda tuba na Tata ya Munu mpe Yandi ke tinda Munu bankonga kumi na zole kumi na zole ya Bawanzio, kana Mu zolaka.” Pilate kuwaka yawu ve, beno zaba.

⁸⁹ “Kana ya kele Nge! Kana ya kele Nge. Oh, ya kele Yandi ve. Mpamba ve, beno tala Yandi ke basika menga. Hé, basoda yankaka kwendaka kuna mpe losilaka Yandi mate na kizizi.” Ba losilaka Yandi mate, ba sekaka Yandi, ba bendaka Yandi na mandefu na ngolo. “Oh, ya kele Yandi ve! Ve, ya kele yandi ve! Mu ke tobola Yandi, bakala. Mu ke tula Yandi kuna na zulu. Mu me kuzwa Nge ntangu yayi!”

⁹⁰ Ntangu Yandi bokaka na mbala ya nsuka, “Eli! Eli! Nzambi ya Munu! Nzambi ya Munu!” Ya vwandaka muntu. “Samu na yinki Nge me yambula Munu?”

⁹¹ Na nsaba ya Gethsémané, lutwadusu ya kimpeve kubikaka Yandi, beno zaba, ya lombaka ti Yandi kufwa mutindu nsumuki. Yandi kufwaka nsumuki, beno zaba yawu; masumu ya Yandi ve,

kasi ya munu na ya beno. Ya ke kisika yina zola yayi kwisaka, Mutindu Yandi bakaka ya munu! Oh, alleluia, Yandi bakaka ya munu!

⁹² Mpe Yandi vwandaka kuna, Yandi lendaka fungula yinwa ya Yandi ve. Ntunga tubaka, “Benno zaba, mu ke kwikilaka ti Yandi vwandaka muntu mutindu bantu nionso. Yandi butukaka na mwense ve, samu mu me tobola Yandi na ntunga ya munu.”

⁹³ Mpe yandi kwisaka, ya kotisaka Yandi ntunga ya yandi, kasi na mbala yina ya simbaka ve, bakala! Ya ke kisika yina yandi zimbisaka ntunga ya yandi. Yandi lenda kutobola diaka ve na ntangu yayi, ya bikaka ntunga ya yandi kuna. Yandi vumbukaka na lufwa na kilumbu ya tatu, mpe tubaka, “Mu kele Yandi yina kufwaka, mpe Mu me vutuka diaka na luzingu, mpe mu ke zinga mvula na mvula, Mu ke na bafungula ya lufwa mpe ya difelo.” Yinga, tata. yandi zimbanaka na kumona Nani ya vwandaka. “Mpe samu Mu ke zinga, beno mpe ke zinga. Ya me monisama ntete ve. . .”

⁹⁴ Kilumbu mosi, bilumbu tatu to yiya na manima ya yina, na manima Yandi zangukaka na Tata, Yandi vutukaka, na yawu bantu yankaka tubaka, “Oh, Yandi kele. . . Yandi—Yandi fwana vwanda mukuyu. Yandi fwana vwanda na kima mosi mutindu mukuyu na Bakala yayi. Mpe beto. . . Nge monaka Yandi. Nge monaka vision.”

“Ve, Yandi vwandaka Yesu ya kieleka.”

⁹⁵ Thomas tubaka, “Bika ti mu mona maboko ya Yandi mpe nionso yina, mu ke tuba na beno kana ya ke mutindu yina.”

⁹⁶ Yandi tubaka, “Munu Yandi yayi.” Yandi tubaka, “Benno ke na mbisi na dimpa kuna? Benno natila Munu sandwich.” Mpe ba natilaka Yandi Sandwich mosi, mpe Yandi telemaka kuna mpe Yandi kudiaka yawu. Yandi tubaka, “Ntangu yayi, mpeve lenda kudia mutindu Mu me kudia? Mpeve ke vwandaka na nsuni mpe mikwa mutindu Mu ke na yawu?” Benno me mona? Yandi tubaka, “Mu kele Yandi. Mu kele yina.”

⁹⁷ Mpe Paul tubaka, “Ya me monisama na beto ntete ve mutindu ya nzutu beto ke vwanda na yawu, kasi beto zaba ti beto ke vwanda na nzutu mutindu ya Yandi.” Yinki? Yandi vwandaka na nzutu yina ya kimpeve? Yinga, tata! Ntangu Yandi kufwaka, Biblia me tuba ti “Yandi,” kele kiyingilu kimuntu diaka, “Yandi kwendaka na difelo mpe longaka na mioyo yina vwandaka na boloko.” Alleluia! Wapi mutindu Yandi salaka yawu? Yandi vwandaka na nsatu ya kusimba, Yandi vwandaka na nsatu ya kuwa, Yandi vwandaka na nsatu ya ndinga, Yandi longaka na nzutu yina mu monaka bantu yina ya nkembo vwandaka na yawu na mpimpa yina. Yandi longaka na myelo yina vwandaka na difelo, yina balulaka ntima ve na ntangu mvibudulu vwandaka na bilumbu ya Noé.

⁹⁸ Kasi ntangu Yandi vumbukaka na Paki, ya vwandaka diambu ya mpasi ve ti nzutu yina kumona kupola, samu David profete monaka yawu na ntwala, “Mu ke bika ve moyo ya Yandi na yinza ya bantu ya kufwa, to ke pesa muswa ve ti Muntu ya Munu ya Santu kumona kupola. Mpe nzutu ya Munu ke pema na kivuvu, samu Yandi ke bika ve moyo ya Munu na yinza ya bantu ya kufwa, to Yandi ke bika ve Muntu ya Munu ya Santu kumona kupola.” Mpe na bangunga makumi sambwadi na zole na ntwala kupola kukota, nzutu yina ya kimpeve, yina kwendaka kuna mpe longaka na myelo yina vwandaka na boloko, yina balulaka ntima ve na ntangu mvibudulu vwandaka na bilumbu ya Noé, vumbukaka diaka, mpe nzutu ya lufwa lwataka yina ke kufwaka ve, mpe Yandi telemaka kuna mpe Yandi kudiaka, mpe Yandi tubaka na beto ti Yandi vwandaka Muntu. Alleluia!

⁹⁹ Ya ke mutindu yina beto ke mona Yandi, Mpangi Evans. Ya ke na ntangu Yandi ke vwanda na kiti ya kimfumu ya David. Alleluia! Ya ke kuna beto ke tambula na makulu, mu ke sala nziete na beno na zulu ya miongo na kati mafuku ya bamvula, beno me mona, na mwa bilumbu fioti, na mwa minuti fioti, beto ke kwenda kuna, beto ke vwanda kuna.

¹⁰⁰ Mpe kana ntangu ya kudia me lunga, beno zaba, kima ya ntete beno zaba, Mpangi-kento Wood tubaka. . .Mu tubaka, “Mpangi-kento Wood, mbote, wapi nge vwandaka na ntangu nionso yayi? Mu me mona nge ve kubanda. . .ya ke monana ti ya me sala minuti kumi na tanu.”

“Oh, ya me luta bamvula mafunda zole, Mpangi Branham.”

¹⁰¹ “Uh-huh. Wapi mutindu nge ke na kutala na nzutu?” Oh, kieleka nge lenda ve kutala na nzutu kima yankaka ve kasi mbote.

¹⁰² “Tala, beno kwisa awa, babakala, mu ke talisa na beno kima mosi, bampangi, bampangi ya munu ya luzolo. Yinto ya masa kele awa, ya kulutila kitoko yina beno me kunwaka ntete ve. Mpe, oh, beto ke kunwa masa ya madidi ya kitoko. Mu ke tanda diboko kuna samu na kubuka kinkuku ya nene ya bambuma ya raisin, mpe beto nionso ke kuvwanda kuna mpe ke kudia yawu.” Ya ke vwanda mbote ve? Ya ke vwanda mbote kaka. Ya ke kaka mutindu yina.

¹⁰³ Wapi mutindu beto me kuzwa yayi? Wapi mutindu beto me zaba yawu? Nzambi, na ntwala ya mbatukulu ya yinza, zabaka beto ntete! Banani? Bayina kele na Yinsi ya nsilulu.

. . .zabaka beto ntete samu na lukumu ya bana na nzila ya Yesu Klisto. . .landila kiesa ya luzolo ya yandi ya mbote.

Na lukumu ya nkembo ya yandi. . .

Samu ti beto kembila Yandi mutindu Yandi tubaka. Yawu yina Yandi vwandaka, Nzambi. Beto zola kukembila Yandi.

. . . lukumu ya yandi *ya nkembo ya lemvo ya yandi, na nzila ya yawu yandi* me ndima beto na *nzila ya mwana ya yandi ya luzolo*. Ya me ndima beto kati na Klisto.

Na menga ya yandi Nzambi kuulaka beto, mpe me lemvo kilaka beto m-a-s-u-m-u. . .

¹⁰⁴ Mu fwana vutuka na lukumu ya bana, kasi mu zola telema awa na “masumu” na mwa ntangu fioti. “Masumu,” beno me bakula yawu? Beno zaba ke fundisaka nsumuki ve samu yandi ke sumukaka? Yandi ke fundisaka yandi samu yandi kele nsumuki. Kana nsumuki ke kunwa fumu, Yandi ke fundisa yandi samu na yawu ve; yandi kele nsumuki, na mutindu nionso. Beno me mona? Beno me mona? Yandi ke na masumu ve, nsumuki ke na masumu ve. Yandi ke kaka nsumuki, beno me mona, yandi ke na masumu ve. Kasi beno ke na disumu, beno Baklisto. Kana beno me bakula awa yandi ke kutuba na Dibuundu. Samu ya vwanda pwelele samu na yandi. Beno me mona? Beno me mona? “Mulemvo ya masumu,” m-a-s-u-m-u. Beto ke salaka masumu. Kasi nsumuki kele kaka nsumuki, Nzambi ke lemvo kilaka yandi ve.

¹⁰⁵ Ntangu yayi, beno ke tuba, “Mbote, yandi kwendaka kuna mpe yandi bulaka muntu munduki. Yinki nge ke sala samu na yawu?” Yina me tala munu ve. Mu ke reformateur ve, mu kele longi. Musiku kele tala diambu yina, ba ke ba-reformateur. Ba ke. . . “Mbote,” tala, “yandi salaka bizumba.” Yayi, yayi—yayi me tala musiku. Ya ke kati-kati ya yandi na musiku. Mu—mu—mu—mu ke reformateur ve, mu ke sungika bantu ve. Mu zola nata bawu na kubalula bantima. Mu ke longi, beno me mona, kimalu ya munu kele kunata yandi na Nzambi. Kana yandi me sumuka, ya ke kimalu ya yandi, yandi kele nsumuki. Nzambi ke fundisa yandi na kisika ya kulutula zulu. Yandi kele nsumuki na kubanda, yandi me fundisama na kubanda. Yandi me lunga ve ata na kisika ya ntete, yandi—yandi—yandi ke kisika mosi ve. Yandi kele nsumuki na kubanda. Yandi ke na masumu ve, yandi kele nsumuki.

¹⁰⁶ Beno lenda basika kuna ve mpe kutuba, “Yayi kele mpimpa, mpe yayi kele mpimpa ve.” Ve, ya ke mpimpa bisika nionso, ya ke kaka mpimpa bisika nionso. Yawu yina Nzambi tubaka. Ya kieleka, yandi ke kaka nsumuki, yimeni. “Ntangu yayi, yandi salaka yayi, yayi kele mpimpa, yayi kele kieleka mpimpa ya nsemo awa.” Mu zaba, kasi ya ke kaka mpimpa bisika nionso, yimeni. Beno me mona?

¹⁰⁷ Mu lendaka tuba ve, “Yayi kele nsemo awa.” Ve, ya ke kaka mpimpa bisika nionso, beno me mona, nsemo kaka, beno lenda tuba ve mbala yikwa. Beno me mona? Kasi kana ya ke ditona ya ndombe na yayi, na yawu ya ke mudidi na kati ya yawu.

¹⁰⁸ Na yawu “masumu,” m-a-s-u-m-u, beto ke na mulemvo ya masumu ya beto na nzila ya (yinki?) Menga ya Yandi, Menga ya ntalu.

. . . *landila bumvwama ya yandi* . . .

109 Yinki mutindu beto ke zimbana yawu? Samu beto kele ya kulunga, beto salaka kima mosi samu na kuzwa mulemvo ya masumu ya beto? Yinki ya Yandi?

. . . *lemvo*;

110 Oh, la la! Mu ke na kima ya kunata ve na maboko ya munu, Mfumu. Mu lenda sala kima mosi ve, ya ke na kima mosi ve mu lendaka sala. Benoit tala! Yandi zabaka munu, Yandi bokilaka munu, Yandi ponaka munu. Mu ponaka Yandi ata fioti ve. Yandi ponaka munu, Yandi ponaka benoit, Yandi ponaka beto nionso. Beto ponaka Yandi ve. Yesu tubaka, “Benoit ponaka Munu ve, Munu ponaka benoit.” Yandi tubaka, “Muntu mosi ve lenda kwisa na Munu kana Tata ya Munu kubenda yandi ve, mpe bayina nionso Tata pesaka Munu ke kwisa na Munu. Mpe ata mosi ve zimbanaka, kaka mwana yina ke zimbana kimakulu, samu na kulungisa Masonuku.” Benoit me mona? Yandi tubaka, “Kasi bayina nionso Tata pesaka Munu ba ke kwisa na Munu.”

111 Oh, mu me baka ntangu mingi, mutindu yina ve? Mpe mu me manisa yawu ntete ve. Mu me banda yawu ntete ve. Mu ke sala nswalu, mu ke tala kima mosi awa na nswalu nionso ntangu yayi, mpe mu ke sala nswalu. Mu ke vutuka na lukumu ya bana na mwa ntangu fioti. Oh, benoit ke lemvokila munu na mwa—mwa ntangu fioti? Beto ke baka yawu awa, ya ke na bantu yankaka me katuka ntama kuna na Georgie samu kaka na nkokila yayi, bantima ya bawu kusakumuka. Ntangu yayi, mpangi ya munu ya bakala ya Georgie, mpe ya Texas mpe bisika nionso benoit me katuka, benoit kuwa nzila yayi ya 5. Beto sukinina na zulu ya yawu na mwa minuti fioti.

Yandi zabaka beto ntete na—na . . .

112 Yinki mpova yayi “na” zola kutuba, mpova yayi “na”? Ya zola kutuba ti kima mosi sika wapi beto ke na kukwenda, na. “Mu ke kwenda na yinto. Mu ke kwenda na kiti.” Humes, nge me bakula yawu? “Mu ke kwenda na chaire.”

Ntangu yayi, Yandi zabaka beto ntete samu na lukumu ya bana na nzila ya Yesu Klisto, landila mutindu ya kiese ya luzolo ya mbote ya Yandi Mosi,

113 Wapi mutindu ya kiese? Kiese ya nani ya vwandaka, mambote ya nani? Ya Yandi Mosi. Kiese ya mbote ya Yandi Mosi ya Luzolo ya Yandi Mosi!

114 Ntangu yayi, yinki kele “lukumu ya bana”? Ntangu yayi mu ke baka diambu yayi, mu zaba ve kana . . . Mu ke vwanda na ntangu ve ya kuzonzila yawu na muvimba, kasi mu ke zonzila kaka mambu ya nene. Na yawu kana ya ke na kiuvu, benoit lenda yufula munu na manima na nsangu mosi, kima mosi. Benoit kuwa. Lukumu ya benoit ya bana kele ve lubutuku ya benoit. Lukumu ya benoit ya bana kele kisika ba me tula benoit. Ntangu benoit me

butuka mbala ya zole, Jean 1:17, mu ke kwikila, ntangu beto me butuka na Mpeve ya Nzambi, beto kele bana ya babakala ya Nzambi. Kasi ba zabaka beto. Ntangu yayi tala kisika yina mu ke meka na kunata beno, beno bana ya kilumbu yayi ya nsuka, beno me mona. Na . . . Beno me mona? Ba zabaka beto samu (na) lukumu ya bana.

¹¹⁵ Ntangu yayi, ntangu yayi beto me kuma kisika yango. Ntangu yayi, tala yina ke niongisa fioti ba-Pentecotiste. Ba ke tuba, “Mu me butuka mbala ya zole! Lukumu na Mfumu, mu me kuzwa Mpeve-Santu!” Mbote. Nge ke mwana ya Nzambi. Ya ke mbote. Kasi yawu yina ve mu ke na kutubila. Beno me mona, ba zabaka beno samu na lukumu ya bana. Lukumu ya bana, ya ke kutula mwana na kisika mosi.

¹¹⁶ Mu me pusana mingi na yayi, samu Becky me tuba na munu ti mu me pusana mingi na yawu, beno yina kele kuna na manima beno lenda ve kukuwa. Mu ke . . .

¹¹⁷ Beno me mona, mwana. Bantu yikwa kuzaba bantumunu ya lukumu ya bana na Ngwisani ya Ntama? Ya kieleka, beno monaka yawu. Mwana mosi ya bakala butukaka. Mu ke kwikila ti mu zonzilaka yawu na dilongi mosi kuna. Yinki yawu kele, Gene, nge ke bambuka na yawu? Ya ke na bande. Oh, yinki ya vwandaka? Mu—mu—mu—mu me zonzila yawu. Oh, yinga, mu ke na yawu, *Beno Kuwa Yandi. Beno Kuwa Yandi*; lukumu ya bana.

¹¹⁸ Ntangu yayi, na Ngwisani ya Ntama, ntangu—ntangu mwana me butuka na dibuta mosi, yandi vwandaka mwana ntangu yandi me butuka, samu yandi butukaka na bibuti ya yandi, yandi vwandaka mwana ya dibuta yina mpe yandi vwandaka muingidi ya bima nionso. Ntangu yayi, kasi mwana yayi vwandaka longusama na balongi. Galates, kapu 5, nzila ya 17 tii na 25. Mbote mingi. Yandi longusamaka na balongi, bantu yina ke sansaka, milongisi. Ntangu yayi, mumbandu, kana mu vwandaka na mwana ya bakala, beto tuba ti, mu kele tata mpe . . .

¹¹⁹ Mpe yawu yina na lubangulu ya Ntinu Jacques, bantu yikwa me bakulaka ti ya vwandaka ya ngitukulu ntangu ba ke tanga na Lubangulu ya Ntinu Jacques, kisika ya me tuba, “Na yinzo ya Tata ya Munu ya ke na bisika mingi ya kuvwanda”? Yinzo mosi, bisika mingi ya kuvwanda. Beno me mona? Ya kieleka, na—na bilumbu yina ba bangulaka Biblia na Ntinu Jacques, *yinzo* vwandaka “kisika mosi.” “Na *yinsi* ya Tata ya Munu ya ke na bisika mingi ya kuvwanda.” Ya ke na yinzo ve, bisika ya kuvwanda, kasi ba me bokila Yandi Tata ya yinsi yayi. Ba me yidika yawu na mutindu ya Biblia, samu na kati ya Biblia ya ke mutindu yina.

¹²⁰ Ntangu tata vwandaka na ferme ya nene ya mafunda ya ba-acre, to kima yankaka, yandi vwandaka na nkonga ya

bantu yina vwandaka sala ksalu na lweka ya yandi *awa*. Yandi vwandaka na bisadi yina vwandaka zinga *awa* samu na kukeba mameme, yandi vwandaka na bayankaka na lweka yayi *awa* samu na kukeba bitwisi, yandi vwandaka na bayankaka *awa* yina vwandaka kwenda kuna na paturage yina vwandaka na bakilometele nkama mosi na makumi sambanu, mpe ya vwandaka na bayankaka kaka *awa* samu na kukeba bankombo, mpe ya vwandaka na bayankaka samu na kukeba ba-mulet na—na bima yankaka. Yandi—yandi vwandaka kaka na kimfumu ya nene. Mpe ya vwandaka mata na zulu ya mwa mbuluku mpe ya vwandaka kwenda tala mosi na mosi samu na kutala mutindu ya vwandaka salama, kukatula mika na mameme mpe bima nionso ya mutindu yina. Yandi vwandaka na ntangu ve. . .

¹²¹ Beno ke kuwa munu ve ntangu mu ke kwenda ntama kuna. Mu—mu—mu ke meka na kutelema awa. Beno ke kuwa munu mbote mingi ntangu yayi, awa? Beno tala.

¹²² Yandi mataka na zulu ya mbuluku, mpe yandi kwendaka, samu na kumeka ku—kukeba kimfumu ya—ya—ya yandi. Na yawu ntangu yayi yandi zola. . .Mwana yina ke vwanda mvingidi ya bima nionso yina Yandi kele na yawu. Yandi kele mvingidi.

¹²³ Mpe ntangu beto me butuka na Kimfumu ya Nzambi, na nzila ya Yesu Klisto, beto kele bankwa ya Zulu, bavingidi kintwadi na Yesu, samu Yandi bakaka kisika ya beto. Yandi kumaka beto (disumu), ti beto lenda kuma Yandi (kieleka). Beno me mona? Yandi kumaka munu samu ti mu kuma Yandi, beno me mona bavingidi kintwadi na Yandi. Mbote mingi, ntangu yayi beno bambuka moyo ti, ya ke samu beno nionso.

¹²⁴ Ntangu yayi, beno bambuka moyo, Nzambi zabaka beno, na luzabu ya mantwala, ti beno ke kwisa na Yayi. Bantu nionso ke bakula yawu, beno telemisa maboko ya beno, beno me mona. Nzambi, na luzabu ya mantwala, zabaka beno ti beno ke kwisa na Yinsi ya nsilulu. Yinki kele Yinsi ya nsilulu samu na Muklisto bubu yayi? Beno telemisa maboko ya beno kana beno me zaba yawu. “Nsilulu kele samu na beno na bana ya beno, samu na bayina kele ntama kuna. Mpe ya ke salama na bilumbu ya nsuka, Nzambi tubaka, ti Mu ke mwangisa Mpeve ya Munu na zulu ya bantu nionso, bana ya beno ya babakala na bana ya beno ya bakento.” Mpe na Esaie 28:18, “Ya fwana vwanda ndiatulu na zulu ya ndiatulu, ntumunu na zulu ya ntumunu; ndambu awa, ndambu kuna. Beno simba yina kele mbote. Samu na bikobo ya kupitakana mpe na bandinga yankaka Mu ke tuba na bantu yayi. Mpe tala kupema, (Kupema) yina ya saba yina Mu tubaka na bawu ti ba ke kota. Mpe, na nionso yayi, bawu zolaka kuwa ve, kasi bawu ningisaka yintu ya bawu mpe bawu kwendaka, mpe mangaka na kuwa Yawu.” Beno me mona? Ya kieleka.

¹²⁵ Yinki ya vwandaka? Ya ke kaka mutindu bantu yayi

katukaka kuna na Canaan, to na Egypte, yina tambulaka kuna na ntoto ya kuyuma, mpe yina kumaka pene-pene, pene-pene mingi samu na kumeka bambuma ya raisin yina katukaka na yinsi. Mpangi-bakala, tala, bantu yayi ke zola ti mu katula yawu, yina mu me tuba na Hebreux 6. Wapi mutindu mu lenda sala yawu? Bayina kele bandimi ya kati-kati, ba ke sabuka ata fioti ve! Ba lenda sabuka ve. Yesu tubaka.

Bawu tubaka, “Tata ya beto kudiaka mani na ntoto ya kuyuma.”

¹²⁶ Mpe Yesu tubaka, “Ba ke, bawu nionso, kufwaka.” Ya ke kukabwana. Ba ke, bawu nionso, kufwaka. Ya kieleka. Yandi tubaka, “Kasi Mu ke Dimpa ya Luzingu yina me katuka na Nzambi kuna na Mazulu. Muntu yina ke kudia Dimpa yayi, yandi ke kufwa ata fioti ve. Ya kieleka. Yinga, tata, yandi kele Luzingu ya Kukonda nsuka kana yandi me kudia Yayi, Mu kele Yinti ya Luzingu yina me katuka na nsaba ya Eden.”

¹²⁷ Ntangu yayi, beno me mona, bantu yayi ke kuma pene-pene mingi! Beno me mona, kana beno tala mbote na Hebreux 6, mu ke vutukila yawu ve, kasi na Hebreux 6, “Bantu yayi ntete, kumaka pene-pene, mpe ba mekaka dikabu ya Mazulu.” Ba vwandaka kuna, bawu monaka bakubeluka ya nzutu me salama, bawu monaka bantu na ngolo ya Nzambi, bawu monaka kusoba ya baluzingu, kasi bawu zola kusimba Yawu ve. Ve, tata. Ve, tata. “Mpe ba me meka ngolo ya yinza yina ke kwisa; mpe kana ba lendaka kuma diaka ya malu-malu mpe kubaluka bantima, ti ba—ti ba me koma na kulunsi bawu mosi Mwana ya Nzambi mbala mosi dyaka, mpe ba me vweza Menga ya ngwisani yina santisaka bawu . . .”

¹²⁸ “Mu ke mundimi ya dibuundu yina ke kwikilaka na kusantisama.” Yina ke kaka mbote, kasi beno ke kwenda ntama mingi ve. Beno me mona? Yinga, tata. Ntoto ya kuyuma kusantisaka bawu. Yinga, ya kieleka. Bawu vwandaka—bawu vwandaka na nioka ya mutaku na autel ya mutaku, mpe nionso yina kuna, kusantisama, kasi bawu kotaka na Palestine samu na kupema. Ve . . .

¹²⁹ Beno tala na Hebreux 4, ya me tuba ve ti “Kupema yankaka”? Nzambi vangaka na kilumbu ya sambwadi mpe pesaka bawu kupema na kilumbu ya sambwadi. Kisika yankaka ya me tuba kilumbu ya kupema, “mpe bubu yayi kati na David.” Na manima Yandi pesaka bawu Kupema yankaka, “Beno kwisa na Munu beno nionso yina me lemba mpe kele na kizitu, Mu ke pesa beno Kupema.” Beno kota na Kupema yango! Samu beto yina me kota na Kupema yayi beto me pema na bisalu ya beto mutindu Nzambi salaka na saba ya Yandi. Ya kieleka. Beno tala saba ya beno, Kupema. Ya ke na Kupema ya kieleka na Yinsi yayi ya nsilulu.

¹³⁰ Mpeve-Santu kele nsilulu ya bantu. Mpe samu na yinki ba ke zola balongi ya kulonguka ya mayele yina ke bika bawu kulwata bakupé mpe kuzenga bansuki ya bawu, mpe kutula bikoba mbwaki, mpe babakala kubula bansaka ya mbongo mpe kunwa malafu mpe kutuba mambu ya buzoba, mpe ba ke landila kaka mutindu yina mpe ba ke sala mambu ya mpamba-mpamba, mpe ba ke kukibokila bandimi ya dibuundu? Mpamba ve, ba ke baka kima ya mutindu yina mpe ba ke manga lutwadusu ya Mpeve-Santu! Mpamba ve, Biblia me tuba ti Ndinga ya Nzambi kele ya nsongi mingi kulutila mbele ya menu zole yina ke zenga butonfo ya mikwa, mpe ke swasikisa mabanza ya ntima. Yinga, ata mpe mabanza ya ngangu!

¹³¹ Mpe kana beto ke zolaka yinza to bima ya yinza, zola ya Nzambi kele ve na kati ya beto. “Ba me bokila bantu mingi, kasi ba me soola bantu fioti; samu mwelo kele ya fioti mpe nzila kele ya fioti mingi yina ke twadisa na Luzingu, kasi bantu fioti ke mona yawu. Bantu mingi ke kwisa na Munu na kilumbu yina mpe ke vwanda na Kimfumu,” Yesu tubaka, “na Abraham, Isaac na Jacob. Kasi bana ya kimfumu ba ke bingisa bawu, mpe ba ke tuba, ‘Mfumu, beto salaka yayi ve na Nkumbu ya Nge? Beto longaka ve? Beto vwandaka ve Docteur *Kingandi* mpe Révérend *Kingandi*?’ Mu me zaba beno ve. Beno kwenda ntama na Munu, beno bisadi ya masumu ya nkú, Mu me zaba beno ve. Ya kele ve bayina nionso ke tubaka, ‘Mfumu, Mfumu,’ ke kota. Kasi bayina ke salaka Luzolo ya Tata ya Munu yina kele na Mazulu, bawu yina ke kota.”

¹³² Yawu yina, nkotolo na Yinsi ya nsilulu. Yinki mutindu beto ke kotaka na yawu? Ba zabaka beto na ntwala samu na yawu. Dibundu, na nzila ya luzabu ya mantwala ya Nzambi, ya zabaka beto na ntwala (samu na yinki?) samu na lukumu ya Yandi, na nzila ya lemvo ya Yandi, samu na nkembo, mpe lukumu na nkembo ya Nzambi. Tata, yina vwandaka kuna na mbandukulu, yina vwandaka zinga na yandi mosi, kima mosi ve vwandaka pene-pene ya Yandi, ya zolaka kima mosi samu na kukembila Yandi, na yawu Yandi kubikaka mpe zabaka dibuundu na ntwala, mpe na ntwala ya mbandukulu ya yinza, mpe tulaka bankumbu ya bawu na kati ya Buku ya Luzingu, ntangu ba . . . kufwaka na ntwala ya mbandukulu ya yinza, ti ba ke monisama samu na nkembo ya Yandi mpe samu na lukumu ya Yandi na ntangu ya nsuka, ntangu ya ke vukisa bima nionso kati na Muntu yina mosi, Klisto Yesu. Fiou! Nkembo! Yawu yina. Ya ke kaka . . . Mpe yawu yina kaka kuna, mpangi ya munu ya bakala, mpangi-kento. Beno katuka Kuna ata fioti ve.

¹³³ Nzambi, na nzila ya nsodolo ya Yandi ya lemvo, bokilaka beno. Nzambi, na nzila ya nsodolo ya Yandi ya lemvo, santisaka beno. Nzambi, na nzila ya nsodolo ya Yandi ya lemvo mpe ngolo ya Yandi, botikaka beno mpe tulaka beno na yinsi yayi ya Kupema. Bayina kotaka na Kupema yayi me kupema na

kuzimbana. Ba me pema na bisalu ya bawu mutindu Nzambi salaka na yina ya Yandi. Ba ke na kiese ba lenda zonzila ve, mpe ya kifuluka na nkembo! Yintu ya Luzingu ke na basisa bafelele na kati ya bawu. Ba ke na ntima ya yinda, bantu ya lembami, ba ke na mambote, lukwikilu yina me salama na mvibudulu, lukwikilu, lembami, lutondo, mpe nionso yina. Yinti ya Luzingu ke na kubasisa bafelele na kati ya bawu samu kivuvu ya bawu kele kati na Yesu Klisto, mbingi ya Mpeve-Santu yina ke sala kimbangi na bidimbu mpe mambu ya ngitukulu ke fidisa bakwikidi. “Bidimbu yayi ke fidisa bayina nionso ke kwikila.” Na mutindu ba ke kwenda, ba ke belusa bambevo, ba ke basisa bampeve ya yimbi, ba ke tuba na bandinga ya malu-malu, ba ke mona ba-vision. Ba . . . Mpe ba ke tambula na Nzambi, ba ke tuba na Nzambi. Ata mpeve ya yimbi mosi ve ke kubwisa bawu, ba lenda kubwa ve, ba ke na kusosa . . . ? . . . Na kubanzaka diaka ve mambu yina lutaka, ba ke na kusala ngolo samu na kuzwa mambu yina kele na mantwala kidimbu ya mbokolo ya mazulu na Klisto Yesu. Bawu yina. Bawu yina. Dibuundu yango yawu yina.

134 Yinki mutindu ba me kuma kuna? Beno lenda tuba ve ti, “Mbote, Mfumu, Nge zaba, kilumbu mosi mu bandaka na kunwa fumu, mpe munu kubwaka, na yawu mu banza ti mu ke . . .” Oh, ve, ve, ve, ve.

135 Luzabu ya mantwala! Yandi bokilaka beto mpe ntangu beto me landa Yandi ya ke na ntangu yina beto me tuba, “Nzambi, beto zimbanaka mpe na nsuka. Beto vwandaka ve na dibanza ya kukivulusa beto mosi. Beto vwandaka na nkadulu ya ngulu, beto vwandaka bangulu na kubanda.”

136 Beno kwenda na lupangu ya bangulu mpe beno tala kiboba ya ngulu ya kento, mpe beno tuba, “Ntangu yayi, beno tala awa, kiboba ya ngulu ya kento, mu zola tuba na nge kima mosi. Ya ke mbote ve samu na nge na kunwa bima ya mvindu.”

137 Ya ke tuba, “Grone-grone.” Beno me mona? Ntangu yayi, tala mutindu beno lenda kukivulusa beno mosi. Ya kieleka.

138 Beno ke tuba, “Mama, nge lendaka lwata bilele ya mutindu yina ve, nge lendaka lwata na mutindu ya mbote. Nge lendaka sala mutindu *yayi*. Nge lendaka kwenda ve na . . . Nge lendaka kwenda ve na bansaka yina ya bakalati. Nge lendaka kunwa fumu ve. Nge lendaka ve kusala mutindu *yayi*. Tata, nge lendaka ve kulwata *yayi*.”

139 Yandi ke tuba, “Grone-grone. Mu kele mundimi ya *Grone-grone*.” Uh-huh. “Grone,” yawu yina kaka ba me zaba. “Mbote, mu ke tuba na nge ti mu ke kaka mbote mutindu mosi na nge. Grone-grone!” Beno me mona, ba me losa lutwadusu ya Mpeve-Santu, samu Biblia tubaka ti kana beno ke zolaka yinza to mambu ya yinza, zola ya Nzambi kele na kati ya beno ve.

¹⁴⁰ Yinki ke sala bawu ya luswaswanu? Beno kele yinsi ya santu. Yinki beno salaka? Beno me basika na yinsi yina. Beno me kota na Yinsi yankaka. Yinki mutindu beno me kuma kuna? Ya ke Yinsi ya nsilulu. Wapi mutindu ya nsilulu? “Ya ke salama ti na bilumbu ya nsuka, Nzambi tubaka, Mu ke mwangisa Mpeve ya Munu na zulu ya bantu nionso.” Na Mpeve mosi beto nionso me botama kati na Yinsi yayi ya nsilulu. Amen. Bampangi-babakala mpe bampangi-bakento, alleluia, na bantima ya kunkete, kukondwa kimpala, kukondwa kuyina, kima mosi ve! Mu ke kipe ve kana mpangi ya munu ya bakala me zimbana, mu ke kipe ve yina yandi me sala, beno ke kwenda sosa yandi.

¹⁴¹ Ntama mingi ve mu kwendaka landa mpangi-bakala mosi, yina zimbanaka. Bakala mosi ya ntwenia tubaka na munu, yandi tubaka, “Bika muntu yina ya kukondwa luzitu kukwenda. Bika yandi kwenda.”

¹⁴² Mu tubaka, “Kana mu lenda kuma ve na kisika yina ntima ya munu ke banza ve na mpangi ya munu ya bakala, na yawu ya ke ntangu samu na munu na kukwenda na autel, samu mu me kubwa nsi ya lemvo.” Mu tubaka, “Mu ke kwenda kana yandi ke na pema na kati ya nzutu ya yandi, mpe mu ke kanga yandi kisika mosi kuna na nzila.” Yinga, tata. Mpe mu kangaka yandi, alleluia, mu vutulaka yandi. Yinga, tata. Yandi me vutuka na lupangu na lukengolo ntangu yayi. Yinga, tata. Yandi zolaka zimbana ya kieleka kaka.

¹⁴³ Na mwa ntangu fioti me luta ntangu mu monaka mwa kento yango ya kuvwanda kuna, mpe shérif bokilaka munu, yandi tubaka, “Tala, ba pesa yandi kazaba ya bilawu.” Yandi tubaka, “Yandi ke kaka na kidi-kidi, yintu ya yandi kele mbote ve.” Yandi-yandi, ba nataka yandi na hôtél. Bawu kumaka.

Mu tubaka, “Ya ke kuma mbote.”

¹⁴⁴ Yandi tubaka, sherif tubaka, “Tala, Billy!” Mu zaba yandi kieleka mbote, mpe mu zaba yandi kubanda mu vwandaka mwana ya fioti. Yandi tubaka, “Kana ya ke kima mosi mu lenda sala samu na kusadisa nge.”

Mu tubaka, “Ya ke kuma mbote.”

Yandi tubaka, “Nge lenda sadisa yandi?”

Mu tubaka, “Ve, kasi *Yandi* lenda.” Mu tubaka, “Vingila fioti.”

¹⁴⁵ Na yawu ba basisaka yandi kuna. Mpe ntangu yandi me kwenda ntama mingi ve, ya vwandaka na ngemba. Yinki ya vwandaka? Beto landisaka kisambu na manima ya yandi. Amen! Yandi vwandaka mutindu. . .

¹⁴⁶ Ba tubaka, “Nge zola bokila dokotolo?” Ba tubaka na bakala ya yandi, “Nge zola bokila dokotolo?”

147 Yandi tubaka, “Dokotolo lenda sala kima mosi ve samu na yandi.” Mpe ya ke mbote. Yintu ya yandi ke sala mbote ve; dokotolo lenda sala kima mosi ve samu na yandi.

Yandi tubaka, “Kivuvu ya beto mosi kaka kele beto kwenda *kuna*.”

Mpe yandi tubaka, “Billy, mu ke bakula yawu ve.”

Mu tubaka, “Mu ke vingila ve ti nge bakula, nge me mona. Mu ke vingila ve ti nge bakula.”

148 Kasi, oh, la la, ata munu mpe ke bakula yawu ve! Ve. Kasi, mpangi-bakala, Nzambi na Mazulu. . . Mu vwandaka me zimbana kuna, na ntangu mosi, Kima mosi kwisaka sosa munu. Amen! Ya kele ve ti samu mu zolaka kukwisa, kasi, ve, Kima mosi kwisaka sosa munu. Samu na ntwala ya mbandukulu ya yinza, Nzambi zabaka munu na mantwala, alleluia, ti beto lendaka vwanda ya Yandi, samu na lukumu mpe nkembo ya Yandi. Beno kuwa! Bayina Yandi zabaka, Yandi yinki? Bokilaka. Ya kieleka? Yandi bokilaka beno? Yinga! Samu na yinki Yandi bokilaka beno? Yandi zabaka beno. Bayina Yandi zabaka, Yandi bokilaka bawu; bayina Yandi bokilaka, Yandi me nungisa bawu. Mutindu yina? Mpe bayina Yandi nungisaka, Yandi me kembisa bawu! Amen! Biblia me tuba mutindu yina. Bayina Yandi zabaka, Yandi bokilaka bawu. Konso nsungi! Bayina Yandi bokilaka, Yandi me kembisaka bawu dezia. Yinki? Beno bika mu tanga Masonuku awa. Mbote mingi.

Ya zabaka beto na mantwala samu na lukumu ya bana na nzila ya Yesu Klisto na yandi mosi, landila luzolo ya Yandi Mosi. . .

Samu na balukumu ya nkembo ya yandi. . .

149 Oh, beno me bakula yawu? Samu na balukumu ya nkembo ya Yandi! Ti Yandi vwanda kuna na bambandu ya Seko yina ke na kwisa, mpe bana ya Yandi lendaka boka, “Abba, Tata! Abba, Tata!”

150 Mpe Bawanzio ke tuba, “Yinki ba ke na kutuba? Yinki ba ke na kutuba?”

151 Beto ke na kifwani ya yawu ya kitoko mingi na mwana ya bakala yina zimbana. “Mu vwandaka ya kuzimbana.” “Yayi mwana ya munu. Yandi vwandaka ya kuzimbana mpe ntangu yayi yandi me monana. Yandi kufwaka, mpe yandi ke zinga diaka. Beno nata mwana ya ngombe ya mafuta, dizwela ya kitoko mingi, lupeta mpe beno lwatisa yandi na musapi. Mpe beto. . .” Kuyituka ve ntangu bambwetete ya suka yimbilaka kintwadi, bana ya Nzambi bokaka na kiese, ntangu ba monaka manaka ya mpulusu, Nzambi ke na kutula nkumbu ya beno na Buku na ntwala ya mbandukulu ya yinza.

152 Ntangu yayi beno ke tuba, “Calvin kwikilaka kima ya mutindu yina.” Mu kwikilaka ve na Calvin. Calvin vwandaka

muntu ke kufwaka bantu. Calvin kufwaka muntu mosi samu yandi ba botikaka yandi na Nkumbu ya Yesu. Yandi vwandaka muntu ya kukondwa luzitu, yandi mosi vwandaka na nsatu ya kubalula ntima, yandi mosi. Yinga, tata. Kasi yina yandi tubaka, samu na mambu yankaka yandi tubaka, vwandaka mbote. Kele ve. . . kasi yina yandi. . . Nsalulu ya yandi, muntu yina ke kufwa muntu yankaka samu na diambu ya mutindu yina, ya diambu ya boma, ya ke disumu. Mbote mingi.

Ti yandi me mwangisa na zulu ya beto. . .

¹⁵³ Oh, beno vingila, mu me zonzila ve “lukumu ya bana,” mutindu yina? Mu me luta ntangu? Beto tala yina montele yayi me tuba awa, wapi ngunga ya me kuma. Mbote mingi. Beto baka kaka—kaka minuti kumi samu na zola ya bantu yayi me katuka ntama. Beno tala. Beno tala.

¹⁵⁴ “Lukumu ya bana,” beno bika mu tuba na beno samu na yinki ya me salama ntangu yayi. Tata yina kele na kimfumu ya nene, yandi ke na kubaluka kuna. Tala yandi me buta mwana ya bakala. Oh, yandi ke na kiese mingi! (Ya ke Nzambi.) Na yawu beno zaba yina tata yina ke salaka? Yandi me mona musansi ya kieleka, mulongisi. Beno zaba yina mulongisi kele, mutindu yina ve? Yandi kele mulongisi ya lukolo. Yandi ke kuzwa mulongisi ya lukolo ya kulutula mbote yina yandi lenda mona na yinsi ya muvimba. (Na yawu beto ke kuma kuna, ntangu yayi, beno kuwa.) Mpe yandi ke kuzwa mulongisi ya lukolo ya kulutula mbote yina yandi lendaka kuzwa. Yandi ke baka kaka ve muntu ya mpamba-mpamba, yandi zola ti mwana ya yandi kuvwanda mwana-bakala ya kieleka.

¹⁵⁵ Beno zola diambu ya mutindu yina ve samu na bana ya beno? Ya kieleka, beno zola pesa bawu kima ya kulutula mbote! Yinga, tata. Na yawu kana muntu ya nsuni ke banzaka mutindu yina, yinki beno ke banza Nzambi ke banzaka samu na bana ya Yandi? Kima ya kulutula mbote yina Yandi me kuzwa.

¹⁵⁶ Na yawu, yandi zola muntu yina ke vwanda ya kuvedila. Ntangu yayi, yandi ke zolaka ve muntu yina. . . ya ke zolaka ve muntu yina ke tuba, “Ntangu yayi, tala, mu—mu. . . Junior, nge lenda sala konso kima yina nge zola na kusala, cheri.” “Oh, yinga, tata, uh-huh, yandi ke mbote mingi, yandi ke mwana-bakala mosi ya mbote.” Samu ba lutisa diboko na mukongo ya yandi mpe kupesa yandi lukumu. Ve, ve. Ya ke lomba kubasisa mwana-bakala yina kaka na ntangu yina. Ya kieleka. Yandi ke zolaka muntu yina ke tuba kieleka. Kana mwana-bakala yina kele mbote, tuba na yandi. Kana yandi kele mbote ve, tuba na yandi yina ke tambula mbote ve.

¹⁵⁷ Mpe kana tata ya ntoto yayi ke banzaka ti. . . Beno zola ve ti muntu mosi kuvwanda ya kuvedila na beno, mulongisi ya lukolo kuvwanda ya kuvedila samu na bana ya beno? Ya kieleka. Mbote, yinki beno ke banza yina Nzambi ke banzaka? Mpe Yandi

kuzaba; beto zaba ve, Yandi kuzaba. Beno kele na nsuka, beto lenda zaba ve. Kasi Yandi kele ya Seko mpe Yandi zaba.

¹⁵⁸ Na yawu, beno zaba yina Tata salaka? Yandi tubaka ata fioti ve, “Mu ke kwenda baka pape samu na kukeba bana ya Munu.” To Yandi tubaka ve, “Mu ke baka évêque.” Ve, ve. Yandi salaka mutindu yina ve, samu Yandi zabaka ti pape ke vwanda na kifu, mutindu mosi évêque ke vwanda na kifu. Beno me mona? Yandi tubaka ata fioti ve, “Mu ke baka surveillant général samu na kukeba mabuundu ya Munu.” Ve, ve.

¹⁵⁹ Yandi bakaka Mpeve-Santu. Yandi yina vwandaka Mulongisi ya Yandi, uh-huh, samu na kusansa bana ya Yandi. Mbote mingi. Na yawu yinki mutindu beno ke zaba ti Mpeve-Santu kuzaba yawu? Yandi ke tuba na nzila ya bikobo ya muntu. Yinki mutindu beno ke zaba ti Yandi ke na kutuba Kieleka? Ntangu beno ke mona Mpeve-Santu ke tuba na nzila ya bikobo yina ke tubaka Kieleka kaka na konso ntangu, ke zabisa mambu na ntwala mpe ya ke salama na mutindu ya kulunga, mutindu Samuel tubaka yawu, na yawu beno zaba ti ya kele Kieleka. Ya ke salama na mutindu ya mbote. Samu Nzambi tubaka, “Kana yandi tuba mpe yina yandi me tuba me salama ve, beno kuwa yandi ve, samu Mu ke na yandi ve. Kasi kana ya me salama, na yawu beno kuwa yandi, samu Mu ke na yandi.” Beno me mona? Yawu yina. Ya ke salaka mutindu yina.

¹⁶⁰ Ntangu yayi, na yawu Yandi ke baluka kuna. Ntangu yayi, yinki beno ke banza Mulongisi yayi ke tuba kana Yandi lendaka kwenda na Tata? Mpe kutuba, “Bana ya beno—ya beno ke na kusala mambu ya yimbi. Mu ke tuba na Nge, mwana ya Nge yina ya bakala, yandi, yandi kele kimpumbulu. Yandi ke na yintu matadi, mu me monaka muntu ya mutindu yina ata fioti ve! Oh, la la, Nge zaba yina yandi me sala? Mpe yina ke mwana ya nge ya kento! Oh, fiou, mu zaba ve yinki Nge sala na yandi. Hmm. Mbote, Nge zaba yinki? Yandi ke monana kaka mutindu yandi. . . Yandi me sala kupakula mutindu bana yankaka ya bakento kuna. Ba-Phillistin. Yinga, Tata, yandi zola sala kaka mutindu ba ke sala.”

“Mwana ya munu ya kento?”

¹⁶¹ “Yinga, mwana ya Nge ya kento.” Yawu yina Mpeve-Santu fwana tuba na dibuundu bubu yayi. Kuyituka ve ti beto lenda vwanda na mvumbukulu ve. Beno me mona? Ntangu yayi, ya ke kieleka.

“Yinki samu na Mwana ya Nge ya bakala? Huh? Mutindu mosi.”

“Yinki?”

¹⁶² “Mbote, Nge zaba ti Nge ke tubaka ntangu nionso ti mameme fwana kuvukana kuna na kilanga samu na kudia Madia ya mameme yina kele kuna. Yinga, Nge zaba yina yandi salaka?”

Yandi twadisaka bawu kuna na kati ya matiti ya yimbi. Yandi nataka bawu kaka kuna mpe yandi bikaka bawu nionso kuna na mwa-masa, mpe yandi bikaka bawu kuna na kati ya matiti ya yimbi, samu na kudia mwa matiti yina ke basikaka pene-pene ya masa, mpe ba ke ya kukonda mingi ti ba ke na mpasi mingi na kubasika kuna.” Ya ke ba-évêque, ba-pasteur yina ke manga yina ke pesaka Ngolo. “Mbote, mu ke tuba na Nge kieleka, mu me monaka ata fioti ve nkonga ya mameme ya kidi-kidi na luzingu ya Munu.” Yandi ke zolaka yawu ve. Ve. “Mpe Nge zaba yinki? Bitwisi yina, Nge zaba Nge—Nge tubaka na bawu na kudia luzerne yina—yina kuna, Nge zaba, samu ba kuma mafuta?”

“Yinga.”

“Nge zaba yina ya ke pesaka bawu?”

“Ve.”

¹⁶³ “Matiti ya ntama ya bansende. Yinga. Yandi kotisaka bawu na ba-sociétés mpe nionso yina. Beno me monaka ata fioti ve diambu ya mutindu yina na luzingu ya Nge. Nge me monaka ata fioti ve diambu ya mutindu yina na luzingu ya Nge ya muvimba. Beno zaba yina yandi ke na kusala? Yandi ke tambula kuna na kunwaka fumu ya nene, yintu na zulu. Yandi ke na kento ya yandi, yandi me lwata bakupe kaka mutindu ba-Philistin kuna. Yinga.” Ya ke nsangu ya mutindu yina Mpeve-Santu fwana pesa samu na dibuundu bubu yayi. Ntangu yayi, yinki beno ke banza samu na yawu?

¹⁶⁴ Ya ke lukumu ya bana. Yinki Yandi . . . Yandi salaka? Yandi zabaka beto—beto na mantwala samu na lukumu ya bana. Yandi me pesa beto Mpeve-Santu; beno vingila muniti mosi, lukumu ya bana, yawu yina beto ke na kuzonzila. Lukumu ya bana!

¹⁶⁵ “Mbote, Nge zaba yina yandi salaka? Evêque kwisaka kilumbu yina, mpe tubaka. Yandi vwandaka na lukutakanu mosi ya kubeluka ya nzutu kuna, mpe évêque kwisaka. Bakala mosi, mpangi-bakala mosi kwisaka mpe ya vwandaka sambila samu na bambevo. Mpe yandi tubaka, ‘Sukisa yawu!’

“Oh, oh, yinga, tata évêque, mu ke sala yawu.’

“Nge ke sala na kintwadi ve.’

“Oh, ve, ve, tata évêque, ya kieleka ve.’

¹⁶⁶ “Mpe mu me kwisa samu na kutuba na yandi Kieleka mbala mosi na Ndinga ya Nge. Beno me mona, Yawu yayi. Mu tangisaka yandi misiku ya Nge ya kieleka yina mu fwana sala, mpe yandi ke manga na kuwa yawu. Yandi tubaka, ‘Oh, yina vwandaka samu na nsungi yankaka, samu na mwana yankaka na ntangu yankaka. Ya ke samu na munu ve.’” Yawu yina. Yayi, tala ya ke ya Kieleka, bankundi ya munu. Ntangu yayi beno ke mona samu na yinki dibuundu me kuzwa ve kisika ya yawu, samu na yinki beto me kuzwa ve mvumbukulu, samu na yinki beto kele ve na bima ya nene ke na kusalama? Ya ke samu na yawu.

167 Josué tubaka, “Gad, mu zola ti nge . . . kisika ya nge kele awa na kulandila manaka, kisika ya nge kele awa, awa kaka. Kwise vwanda awa, Gad, mpe bikana awa. Benjamin, nge kwenda kuna. Mpe ntangu yayi beno nionso kuvwanda ntama na ndilulu ya ba-Philistin.” Mpe Josué vutukaka, bawu nionso ke na simu yina kuna na ba-Philistin, ba vwandaka na mukembu ya nene, ke bina mutindu yina, mpe bakento nionso ya kubwakisa bizizi, mpe ke bina bisika nionso mpe ya vwandaka mukembu ya nene. Mpe Josué kwanzaka na yintu, mpe yandi tubaka, “Ntangu yayi yinki?” Ntangu yayi ya ke kaka ya kieleka yina ke na kusalama; nionso ve, matondo na Nzambi, nionso ve, kasi ya ke na mingi. Mbote mingi.

168 Ntangu yayi yinki ke na kusalama kuna? Yawu yina salamaka. Beno lenda banza mbala yikwa Muntu yayi, Mpeve-Santu, ke kuma mbwaki na kizizi na ntuala ya Tata ntangu Yandi fwana tuba mambu yayi? Oh, la la! “Mu—mu—mu tubaka na yandi, kasi yandi—yandi—yandi lendaka kuwa Yawu ve. Mu tubaka na yandi ti, mpe mu tangisaka yandi mbala mosi na Buku. Mu vwandaka—mu tindaka longi mosi ya leke samu na kutuba na yandi ti Yesu Klisto kele mutindu mosi mazono, bubu yayi, mpe kukonda nsuka. Mpe Nge zaba yinki? Yandi bikaka mosi ya—yandi bikaka mosi ya basinzidi yina ya bankombo kukwisa mpe kutuba na yandi ti yina vwandaka samu na nsungi yankaka. Nge me mona? Mpe yandi vwandaka na nsunga ya yimbi mingi, na nsunga ya bankombo, Nge zaba, bafumu, mpe Nge zaba, mpe nionso yina, yandi vwandaka na nsunga ya yimbi mingi ntangu yandi kumaka kuna. Nge me mona? Kasi Mu ke tuba na Nge, sinzidi yina ya bankombo vwandaka na mayaka mingi ya kunamika na zulu ya yandi, na yawu, mu ke tuba na Nge, kana Nge fwana sonika nkumbu ya yandi na zulunale, ya ke lombi (difishi ya yandi) lenda baka kati-kati ya papié samu na kutanga bisalu ya yandi. Yinga, Tata, ba ke zolaka yandi mingi kuna na yinsi yina, kasi, mu ke tuba na Nge, ya kieleka yandi zaba ve yinki mutindu kudisa mameme. Yina ke kima mosi. Yandi ke kuwa Munu ve,” Mpeve-Santu me tuba. “Mu me mekaka kutuba na yandi ti Nge ke mutindu mosi mazono, bubu yayi, mpe kukonda nsuka, kasi yandi—yandi ke sala yawu kaka ve. Yandi ke nsusu me pola na masa yina Mu me monaka ntete ve na luzingu ya Munu. Yinga. Mpe dibuundu tulaka yandi surveillant, évêque, mpe nionso yina, bantu nionso ke na kuwa yandi. Na yawu Nge zaba yinki? Ba ke baka yina . . . ba ke na kima mosi ya ntama kuna yina ba ke bokila ‘televizyo.’ Ba ke tambwisa mwa kima mosi ya ntama kuna, mpe—mpe bakento ke basika kuna mpe ke sala bisala-sala, na bazwela ya mutindu na mutindu na mukongo kati-kati kinkonga. Mpe, Nge zaba, mingi ya bana ya Nge ya bakento kele ku- . . .”

“Oh, ya kieleka ve!” Beno me mona?

169 Yandi tubaka, “Yinga, ba ke kuna. Yinga, ba ke na kusala

yawu. Hum. Bayankaka na kati ya bawu ke na kulomba mvumbukulu, Tata, bayankaka ke na mfunu ya yawu ya kieleka. Bayankaka ke na kutambula na mutindu ya kusungama, bayankaka kele ya kieleka na kwikama na Ndinga. Bayankaka, mu zaba ve yinki kusala, ba ke—ba ke na simu yina. Nge zaba yinki ba ke na kusala? Ba ke na kuseka bayankaka, na kutubaka, ‘Ba ke nkonga ya bilawu.’”

“Mbote, ya ke sala Munu mpasi mingi.”

¹⁷⁰ Kasi ntangu yayi beto soba kifwanikisu. Ntangu yayi Tata, Mwana ya Yandi kele mwana-bakala ya mbote. Tata ya Yandi ntangu nionso—ntangu nionso, ya ke na Mulongisi yayi, Mpeve-Santu. Ya vwanda konso lutwadusu yina ya Mpeve-Santu, Yandi tubaka, “Mu ke tambula,” Mulongisi tubaka, “Mu ke . . .”

¹⁷¹ Mwana tubaka, “Mu ke tambula kaka na Nge. Mu ke kwenda na Nge.”

“Oh, mongo kele yinda mingi, mwana.”

¹⁷² “Mu ke kwenda kaka na Nge. Mu me tula kivuvu na Nge. Kana mu me banda na kulemba, Yandi ke simba munu na diboko samu na kulandila kukwenda.”

“Kasi ya ke na bankosi kuna na zulu ya mongo!”

¹⁷³ “Ya ke sala kima ve samu Nge kele pene-pene, ya ke sala luswaswanu mosi ve. Mu ke tambula kaka na Nge.”

“Ya ke na bampasi kuna, ya ke na matadi ya musielu kuna.”

¹⁷⁴ “Mu ke kipe ve, na ntangu nionso Nge me simba munu na diboko, mu ke tambula na Nge. Mu ke tambula kaka na Nge.”

“Oh, nge zaba yinki? Tata ya Nge vwandaka sala mutindu yina, nge me mona. Ya ke mbote. Yinga, tata.”

¹⁷⁵ Ya ke mata kuna na zulu ya mongo. “Oh,” Yandi ke tuba, “Nge zaba yinki, Tata? Mwana ya Nge ya bakala ke sala me fwana kaka na Tata ya yandi. Yandi kele kaka, ya kieleka mutindu mosi na Nge. Ndinga nionso Nge me tuba, yandi ke tuba ‘amen’ na Yawu. Mu—mu pusaka yandi na kubaka na Biblia ya yandi kilumbu yina, mpe kisika Ya me tuba, ‘Yesu Klisto kele mutindu mosi mazono, bubu yayi, mpe kukonda nsuka.’ Nge zaba yinki yandi tubaka? Yandi bokaka ngolo mpe lemukaka na makulu ya yandi na zulu, mpe yandi tubaka, ‘Alleluia! Amen!’ Oh! Mpe Nge zaba Ya me tuba awa, na—na Ndinga ya Nge, Nge zaba, kisika Nge tubaka, ‘Bisalu, yandi yina ke kwikila na Munu, yandi mpe ke sala bisalu yayi Mu ke sala?’”

¹⁷⁶ “Yinga, mu ke bambuka moyo ti Mu sonikilaka yawu Mwana ya munu. Yinga, mu ke bambuka moyo ti mu sonikaka Yawu.”

¹⁷⁷ “Oh, ntangu yandi monaka yawu, yandi bandaka na kuboka mpe lemukaka na zulu, na kuboka, ‘Alleluia, Mfumu. Basisa na munu mambu nionso ya yinza. Sala munu mutindu Yina!’ Yinga, Tata. Mpe mambu yina nionso yandi salaka!”

178 “Oh,” Tata tubaka, “Mu ke—Mu ke na kiese ya mwana yina. Ya ke mwana ya mbote. Mbote mingi. Landila yandi na mwa bamvula fioti, samu na kumona yinki mutindu yandi—na kumona yinki mutindu yandi ke tambula, mpe yinki mutindu yandi ke landila na kutambula.” Na manima ya mwa ntangu fioti bamvula lutaka. “Yinki mutindu yandi kele?”

179 “Oh, la la, yandi ke na kukula na lemvo! Oh, la la! Yandi ke kaka . . . Yandi ke kaka na tiya. Mu ke tuba na Nge, yandi—yandi kele kaka . . . Mpamba ve, yandi ke baka mameme, ya ke keba yawu kaka—kaka mutindu mosi na Nge. Yandi ke pesa bawu ata fioti ve matiti ya mubu. Yandi ke pesa bawu ve matiti ya bansende. Ntangu ba ke kwisa kuna, na kutubaka ‘beto zola kota na dibuundu’; yandi tubaka, ‘Beno kanga yinwa ya beno, beno ke na nsatu ya yawu ve! Ve, tata. Tala yina beno ke na yawu nsatu, ‘Beno balula bantima mpe beno baka mbotika, beno nionso, na Nkumbu ya Yesu Klisto, samu na mulemvo ya masumu ya beno. Beno ke kuzwa dikabu ya Mpeve-Santu.’” Yinga, Tata, yawu yina yandi tubaka.”

“Oh, ya kieleka yandi me tuba mutindu yina?”

“Yinga, Tata, ya kieleka.”

“Mbote, ya sonikaka Yawu mutindu yina.”

“Ya me tuba Yawu mutindu yina.”

“Hmm!” Yinga, Tata.

180 “Bayankaka tubaka, ‘Beno bikala na mbanza ya Jerusalem tii kuna beno ke fuluka na ngolo ya Mazulu. Mpeve-Santu ke kwisa na zulu ya beno, beno ke vwanda bambangi ya Munu na Jerusalem, na Judée mpe na Samarie, tii na bansongi ya ntoto.’ Ntangu yandi tangaka yawu, yandi bokaka, ‘Alleluia, yawu ya vwandaka na yawu nsatu!’ Nge zaba yina yandi ke sala? Yandi ke bika bawu kuna tii kuna ba ke kuzwa Yawu, yimeni, ya ke vwanda na bawu.

181 “Mpe kana ba me banda na kuswa, yandi tubaka, ‘Hé, hé, hé, beno vingila fioti, beno vingila fioti. Ya ke mutindu yina bankombo ke salaka, mameme ve. Beno me mona? Beno me mona?’ Oh, na bantangu yankaka ba ke dasukila yandi fioti, kasi ya ke lutisa fioti diboko ya yandi na mukongo ya bawu, ya ke tuba, ‘Vingila fioti, shit-shit, shit-shit, sh. Ya ke mbote mingi kaka.’ Yandi zaba kieleka yinki mutindu kuyala mameme ya yandi. Yinga, Tata, Mu ke tuba na Nge.

182 “Nge zaba yinki? Mu monaka Archevêque *Kingandi* kutubaka na yandi ti yandi ‘lendaka kwisa ve na mbanza yayi samu na lukutakanu mosi.’ Kasi, Nge zaba, Mu nataka yandi fioti kuna, Mu tubaka, ‘Kwenda kaka.’ Beno me mona? ‘Beno katula ba-bande yayi, mpe beno bika yawu basika ve.’ Beto kwendaka kaka! Beto kwendaka na bambanza yayi, yandi tubaka, ‘Mbote, beto ke simbi-. . .’

183 “Mpe Nge zaba, diabulu kwendaka kuna, yandi tubaka, ‘Mu ke tula ntembe na Nge ti mu lenda kanga yandi nzila na kukota na mbanza yina.’ Mu tubaka, ‘Nge lenda sala yawu ve. Kana Mu tuba na yandi na kukwenda, yandi ke kwenda. Mu ke tuna ntembe na Nge ti yandi ke kwenda.’ ‘Ve, ve, ve, ve, ve, mu ke tuba na yandi. Mu ke kwenda kuna mpe mu ke tuba, “Ntangu yayi, bantu ya munu nionso, beno vukana beno nionso. Beno ke na nsatu ya bufanatiki yayi ya ntama ve awa, mwa Kubeluka ya nzutu ya ntama mpe mambu yayi ya Mpeve-Santu. Ya me sukaka na bantumwa bamvula mingi me luta. Nge zaba ti ya ke na kima ya mbote ve, kuna na kati.” Yandi vwandaka meka na kupesa bawu matiti ya bansende, mambu ya mutindu yina. Bawu. . .

184 “Kasi, Nge zaba yinki, yandi kwendaka kaka. Yandi kwendaka kaka kuna mpe bandaka na kumwanga luzerne, na. . . Mpe Nge zaba yinki, mameme ya yandi bandaka na kudia, ba kumaka kaka nene mingi. Yinga, Tata. Na bakubeluka ya nzutu mpe balukutakanu ba ke na yawu, Nge zaba, mingi ya bantwenia me kubanda. Mpamba ve, ba me mona ti kana ba ke na mingi ya matiti ya baniama mutindu luzerne. Nge zaba yinki ba me sala na yawu? Ya vwandaka mbote mingi ti ba kwendaka mbangu na bankalani ya bawu, bawu tubaka, ‘Beni meka Yayi! Beni meka Yayi! Beni meka Yayi!’ Beni me mona, atimosifere yina kuna me fwanana na yina kele awa. Yawu yayi awa. Yawu yayi awa, beno me mona. ‘Beni balula bantima ya beno, beno nionso, mpe beno baka mbotika na Nkumbu ya Yesu, beno me mona, beno ke kuzwa Mpeve-Santu. Ya ke samu na muntu yina nionso me zola, yandi kwisa, yandi kwisa awa samu na kumona yina Biblia me tuba.’ Beni me mona? Mpe ba ke na kulutisa ntangu ya mbote kuna.”

185 “Oh, yina mwana ya Munu! Ya ke mwana ya Munu ya bakala. Mbote, Nge banza ti yandi me kukula?”

186 “Yinga. Ya kieleka,” Mpeve-Santu tubaka. “Mu me meka yandi. Bakala, Mu mekaka yandi *awa*, mu mekaka yandi *kuna*. Mu bwisaka yandi, na kimbevo, Mu me niongisa yandi. Mu me niata yandi, Mu me bika diabulu kusala yandi yina yandi me zola, yandi ke telema diaka ntangu nionso. Yandi me kwisa kaka. Nge me mona, ya me telema diaka. Mu me losila yandi kimbevo. Mu me sala *yayi*. Mu me losa yandi na lupitalu. Mu nataka yandi awa mpe Mu me sala *yayi*, Mu me sala *yayi*. Mu me sala ti kento ya yandi kutelemina yandi, Mu me sala ti bankalani ya yandi kutelemina yandi, Mu me sala nionso. Ya me sala ata luswaswanu mosi ve. Yandi tubaka, ‘Ata ti Yandi me kufwa munu, mu ke tula kaka kivuvu na Yandi.’ Mu kufwaka dibuta ya yandi. Mu bakaka *yayi*, Mu salaka *yayi*, Mu salaka nionso *yayi*, Mu salaka *yayi*, *yina*, *kima yankaka*. Kuna diaka yandi telemaka, ‘Ata ti Yandi me kufwa munu, mu ke sadila Yandi kaka! Yandi kele ya munu!’”

187 “Oh,! Mbote, mu ke kwikila ti Beto fwana bokila yandi kisika

mosi kuna na kisika mosi ya luswaswanu samu na kuzwa lukumu ya bana.”

¹⁸⁸ Ntangu yayi, ntangu tata, na Ngwisani ya Ntama, bakulaka ti mwana ya yandi me kukula, mpe me kukula na nzingilu samu na lukumu ya bana. Samu na! Ba ke bana ya yandi na lubutuku, kasi, ntangu ba me kuma bana ya babakala. Kasi ba ke vwanda kaka bana mutindu mwana nionso, mwana mutindu mwana nionso, tii kuna ba ke kula mpe ba ke talisa yina ba kele. Na yawu, yandi ke bokila yandi na ntangu yina.

¹⁸⁹ Ntangu yayi beto me kuma kisika yango, dibuundu. Beno me kubama? Ntangu yayi ya ke na mansukinina fioti, ti bantu nionso ke kukitatika musapi, kunionga na mabanza, mpe kuwa mpasi na ntima, na mwa muniti fioti. Beno me mona? Ntangu yayi beto ke kwenda tula dibuundu na kisika ya yawu. Ntangu yayi na ntangu dibuundu ke kuma na kisika yina, Yandi ke tuba, “Manassé, kisika ya nge yawu yayi. Ephraim, kisika ya nge awa.”

¹⁹⁰ Na yawu ya ke nata yandi na kisika mosi, tata, mpe yandi ke tula yandi na kisika mosi ya zulu mutindu yayi, mpe ya ke vwanda na nkinzi, mpe bawu nionso me vwanda pene-pene kuna. Mpe yandi tubaka, “Mu zola ti bantu nionso kuzaba ti yayi kele mwana ya munu, mpe mu me pesa lukumu na mwana ya munu ya bakala. Mpe mu zola ti bantu nionso kuzaba, kubanda bubu yayi, ti nkumbu ya yandi. . . Mu ke lwatisa yandi, dizwela mosi ya luswaswanu. Mpe mu zola beno zaba ti nkumbu ya yandi na mukanda kele ya kufwana mutindu mosi na nkumbu ya munu. Yandi ke mwana ya munu, mu me pesa yandi lukumu na dibuta ya munu, ata ti ya vwanda mwana ya munu kubanda lubutuku. Kubanda yandi kuzwaka Mpeve-Santu, yandi kele mwana ya Munu. Kasi ntangu yayi mu ke tula yandi na kisika ya yandi na luyalu nionso. Yina ya ke katula na kisalu ke katuka, yina ya ke pesa kisalu ke baka kisalu:

¹⁹¹ “Mpe ya kieleka, ya kieleka, Mu ke tuba na beno, kana beno tuba na yinti yayi, kana beno tuba na mongo yayi, ‘katuka awa,’ mpe beno ke na ntembe ve na kati ya ntima ya beno, kasi beno kwikila ti yina beno me tuba ke salama, beno ke kuzwa yina beno me tuba.” Beno me mona? Yawu yina; yawu yina. Beno me mona? “Yandi ke mwana ya Munu.” Bantu yikwa kuzaba ti lukumu ya bana, ti. . . ba vwandaka pesa lukumu na mwana na manima ya yandi me talisa ti yandi kele. . . Bantu nionso me tangaka ntete Biblia, kisika ya mwana.

¹⁹² Ntangu yayi, Nzambi salaka mutindu mosi samu na Mwana ya Yandi ntangu Yandi zangulaka Yesu na zulu ya Mongo ya Tsobolo. Yandi bakaka Pierre, Jacques na Jean kuna na zulu, bambangi tatu na zulu ya ntoto. Ba vwandaka Yesu, Moise na Elie, na Nzambi, kuna na zulu ya mongo. Ba telemaka kuna na zulu ya mongo. Mpe, kima ya ntete beno zaba, bawu talaka, mpe Yesu kembisamaka na ntwala ya bawu. Ya kieleka? Bantu yikwa

kuzaba ti ya ke Masonuku? Yinki Yandi salaka? Yandi—Yandi lwatisaka yandi bilele ya seko. Mpe yandi tubaka, “Bilele ya Yandi vwandaka ngenga mutindu mwini.” Ya kieleka? Mpe dituti kufikaka bawu. Mpe Pierre na Jean na bayankaka, kubwaka kizizi na ntoto. Mpe bawu talaka, mpe ya vwandaka na Moise na Elie, ke solula na Yandi. Mpe Moise kufwaka, mpe ba zikaka yandi na ntoni yina me zabana ve bamvula nkama nana. Mpe Elie ba zangulaka yandi na zulu na lukalu ya Zulu, bamvula nkama tanu na ntwala ya yawu. Fiou! Kasi ba vwandaka kuna! Ba vwandaka solula na Yandi kuna. Beno me mona, Yandi nataka Yesu kuna na zulu samu na kumona bawu, samu na kumona yinki ya vwandaka, samu na kumona, samu na kutalisa Yandi mambu yayi. Mpe ba solulaka na Yandi, ba vwandaka na masolo na Yandi.

¹⁹³ Na yawu na ntangu Pierre talaka diaka mpe nkembo vwandaka diaka ve na zulu ya Yesu, ba monaka kaka Yesu, mpe Ndinga basikaka na dituti, mpe tubaka, “Yayi kele Mwana ya Munu ya luzolo, beno kuwa Yandi! Nkumbu ya Yandi ke na kiyeka mutindu mosi na ya Munu na ntangu yayi. Beno kuwa Yandi!” Ya ke, bana yina ba me pesa lukumu, to ba me tula na kisika.

¹⁹⁴ Ntangu yayi, ya ke kisika yina Nzambi ke na kumeka kunata dibuundu ya Pantekote na Buku ya Ephésiens. Beno me mona? Beno me, beno me bakula? Beto zola sukisa samu ntangu me luta mingi, beno me mona, bana ke na nsatu ya kulala. Mpe mu zolaka kuma na nzila yayi awa, kasi mu lenda sala yawu ve, tii na nzila ya 13, beno me mona, kitini ya nsuka, “yina ba me tula kidimbu na Mpeve-Santu yina ba silaka.” Beto ke kuma kuna na Lumingu, beno me mona. Beno tala. Ntangu yayi, wapi mutindu, yina ke kotisa beto, mpe wapi mutindu beto me kebama na Yayi.

¹⁹⁵ Kasi ntangu yayi samu “kisika” ya beno, yinki mutindu ya ke salama? Beno ke butuka ntete na Kimfumu na nzila ya Mpeve-Santu. Bantu yikwa kuzaba yawu? Mbote mingi. Ya kulanda, ba me kubika beno samu na yinki? Lukumu ya bana. Yinki ya kele? Ba me kubika beno samu na kubaka kisika ya beno.

¹⁹⁶ Oh, Mpangi-kento Scott, mu ke kwikila, ya me vwanda awa. Ya kele nge yina me vwanda na yinzo bubu yayi? Ya ke na dilongi mosi ke na kutambula na yinza, na bizunga ya mutindu na mutindu ya yinsi, mu me kuwaka yawu, mingi, ya ke tuba ti Yesu kele awa na zulu ya ntoto, ya ke na kutambula na kati ya nzutu, Yandi ke kwenda kuna mpe ke sala diambu yayi. Ya ke luvunu! Mpeve-Santu ya Yandi kele awa, mpe Yandi ke na kumeka na kutula Dibuundu ya Yandi na kisika, kutula Dibuundu ya Yandi na ndonga, kutula yawu na Yinsi ya nsilulu, na yawu ba lenda kota . . . na mutindu ti bambeni nionso kubasika.

¹⁹⁷ Manassé lendaka baka ntoto ya yandi ve. Mu lendaka sala lukutakanu ya kubeluka ya nzutu ve na ntangu ndambu ya . . .

ntangu. . . Mu ke kwenda kuna mpe mu ke longa mbotika na Nkumbu ya Yesu Klisto, mpe—mpe bampangi ya ba-trinitaire ke tuba, “Oh, yandi ke muntu ya Yesu Kaka.” Mpe lendaka kwenda kuna ve mpe kusala lukutakanu ya Kubeluka ya nzutu na ntangu ndambu ya bawu ke tuba, “Kubeluka ya nzutu kele mbote mingi,” mpe mingi ya bawu ke sepela na bimangu ya Mfumu mpe ke tuba, “Mbote, mu ke kwikila ti Mpangi Branham kele profete, kasi beno bika mu tuba na beno kima mosi. Na ntangu nionso Mpeve kele na zulu ya yandi, mpe ya ke na kuswasikisa mabanza, yandi ke musadi ya Mfumu. Kasi Malongi ya yandi kele ya kupola, Ya ke mbote ve.” Nani me kuwaka ntete buzoba ya mutindu yina? To ya ke ya Nzambi to ya ke ya Nzambi ve. Ya kieleka. To nionso kele Nzambi to nionso ke Nzambi ve. Ya ke mutindu yina. Kasi yinki mutindu kusala? Manassé ke zola ve kubikala na ntoto ya yandi, Ephraim ke zola ve kubikala na ntoto ya yandi, Gad ke zola ve kubikala na ntoto ya yandi, Benjamin ke zola ve kubikala na ntoto ya yandi, bawu nionso ke kwenda mbangu samu na kuvukana na ba-Philistin, mpe ba me vukisa nionso. Yinki mutindu beto ke kuzwa kisika ya beto? Kasi beto me butuka na Mpeve-Santu, beto nionso. Ya kieleka? Beto me butuka samu na yinki? Ba me kubika. . . Na manima ya beto me butuka, ba me kubika beto samu na lukumu ya bana, samu na kutula beto na kati ya Nzutu ya Klisto. Beno me mona yina mu zola tuba?

¹⁹⁸ Yinki kele Nzutu ya Klisto? Bayankaka kele bantumwa, bayankaka kele bapofete, bayankaka kele ba-docteur, bayankaka kele ba-évangéliste, mpe bayankaka kele ba-pasteur. Ya kieleka? Ba me bokila beto samu na yawu. Bayankaka kele na makabu ya bandinga ya malu-malu, ntendulu ya bandinga, ndwenga, luzabu, bimangu, kusala bimangu, makabu yayi nionso ya mutindu na mutindu. Mpe kuna yinki bawu salaka? Ba sadilaka yawu fioti. Yinki? Ba ke bika yawu kwenda konso mutindu yina. Muntu mosi ke telema, ya ke tuba bandinga ya malu-malu, mpe yina yankaka ke landila, na kutubaka, “Blu, blu, blu, bleé” Uh-huh. Longi ke na kulonga, ya ke sala lubokilu na autel, mpe muntu mosi ke telema, ya ke tuba na bandinga ya malu-malu mpe ke tuba “Alleluia, nkembo na Nzambi.” Kana—kana longi kulandila na kulonga nsangu ya yandi, samu ya ke na nsi ya kupakulama, na yawu bantu ke tuba na yandi, “tala retrograde yayi.” Beno me mona, ya ke samu ba me longusaka bawu ve.

¹⁹⁹ Biblia me tuba mpeve ya bapofete ke tumama na profete. Nzambi kele yinto ya mubulu ve. Ntangu mu me telema awa, to longi mosi awa ke na nsi ya kupakulama ya Nzambi. Ata yinki mutindu beno zola tuba na bandinga ya malu-malu, beno fwana vwanda swi tii kuna Nzambi ke manisa awa. Na yawu kana beno ke tuba na bandinga ya malu-malu, ya lenda vwanda kaka ve kuvutukila Masonuku, samu Nzambi tubaka ti beno vutukila

kaka bampova ve. Kasi ya ke mbala mosi nsangu samu na muntu mosi. Beno yufula munu mbala mosi, beno talisa na munu mbala mosi yina Mpeve-Santu, na kuswasikisa mabanza, tubaka na muntu mosi, na kuvutukila kaka Disonuku mosi ntangu nionso. Ya vwandaka tuba na bawu yina vwandaka tambula mbote ve na bawu mpe kima yina ba salaka, mpe kima yina ba fwana sala to kima yina fwana salama, to kima ya mutindu yina. Ya kieleka?

²⁰⁰ Ya ke mutindu mosi na bandinga ya malu-malu mpe ntendulu! Kana muntu mosi na kati ya yinzo-Nzambi ke na kutuba na bandinga ya malu-malu, mpe yankaka kutendula yawu, bika ya zonzila kima ya mutindu yayi. Beto tuba ti Mpangi Neville kutelema mpe yandi tuba na bandinga ya malu-malu, mpe mpangi-bakala yayi awa kupesa ntendulu, yandi tuba, “Tuba na muntu yayi ti mazono yandi kwendaka kuna mpe yandi salaka kima yina yandi lendaka sala ve. Ntangu yayi dokotolo me tuba na yandi bubu yayi ti yandi ke na cancer. Kwenda sungika kima yina, na manima beno vutuka awa mpe beno vwanda ya kusungama na Nzambi.”

Muntu yango ke tuba, “Ya kieleka, ya ke ya kieleka.” Na yawu Nzambi kele na beno.

²⁰¹ Kasi yinki mutindu beto ke sala yawu mutindu yayi? Beno me mona? Ya ke kaka, “Blum, blu, blu, blu.” Ya ke kaka na kintulumukina, konso mutindu yina, ata kisika mosi ve na mutindu nionso. Ntangu yayi ya ke. . . Beno me mona, ba-Ephésien, ke na kumeka. . . Beno me mona, ba me luta na lweka ya yawu. Beno me mona yinki mutindu ba me luta na lweka ya yawu? Ba me kubika beto samu na lukumu ya bana! Ntangu yayi bantu yikwa me bakula yina mu zola tuba, beno telemisa maboko ya beno. Lukumu ya bana! Beto me butuka na Mpeve ya Nzambi, ya kieleka, beto ke kuzwa Mpeve-Santu, mpe beto ke boka, “Abba, Tata! Alleluia! Nkembo na Nzambi!” Beto kele, ya kieleka, beto kele bana, kasi beto lenda kuma kisika mosi ve. Beto lenda nunga ba-Philistin ve.

²⁰² Beno tala Billy Graham yina vwandaka kuna. Mpe Musulman yina vwandaka tuba na yandi, “Talisa Yawu.”

²⁰³ Beno tala Jack Coe yina vwandaka kuna. Mpe muntu yina vwandaka kwikila na Nzambi ve, mundimi ya dibuundu yayi ya Klisto yina vwandaka pesa mbote na muntu yayi ke kwikilaka na Nzambi ve kuna, mpe yina vwandaka kota na diambu yango. Muntu yina lendaka vwanda Muklisto, mpe yina ke pesa mbote na mpeve ya yimbi mutindu Joe Lewis, mpe muntu ya kimpwanza ya mabanza, mpe yina singaka Nzambi mpe tubaka “Nzambi kele ve, na mutindu nionso, samu na kubanda,” mpe bima ya mutindu yina. Mpe dibuundu yina ba ke bokila bawu mosi dibuundu ya Klisto, ba ke pesa yandi mbote kuna mpe ba ke telemina Mpangi Jack Coe. Wapi mutindu beto lenda kuma kisika mosi? Mpe ba-Pentecotiste, mingi kati ya bawu me

telemina yandi; kasi, balongi nionso na yinsi ya beto lendaka simbisa yandi na ntima mosi, mpe kutuba, “Nzambi, tinda Lulendo ya Nge.” Beno me mona, beto me kuma kisika yango, ya lendaka baka kisika ya yandi ve.

²⁰⁴ Ephraim zola bikala kuna ve. Mosi ya bawu ke kwenda na lweka yayi, beto ke mona Manassé na lweka yayi, yandi ke tuba, “Oh, la la, Mfumu me pesa munu kilanga ya kitoko ya masangu!” Na manima tala Gad ke kwisa, kuna, yandi ke tuba, “Mbote, ntangu yayi, vingila fioti. Mu zolaka sala kilanga ya avoine, kasi mu ke sala mpe masangu. Alleluia!” Beno me mona? Nge ke na kima ya kusala na masangu ve; sala avoine, avoine ke kisalu ya nge. Nge lendaka kusansa mameme ve na kisika nge kusansa bitwisi. Nzambi zola tula dibuundu na kisika ya yawu. Kasi bawu nionso zola sala kima mosi. “Alleluia!” Mpe beno lenda tuba na bawu kima mosi ve samu na yawu. Ve, ve. Ba ke kaka na nkadulu yina ya nkombo, “Kasi, kasi, kasi, kasi, kasi, kasi, kasi.” Beno me mona, beno lenda tuba na bawu ve. Ya kieleka. Ntangu yayi, ya kieleka? Mpe beno lenda tula dibuundu na kisika ya yawu ve. Beno me mona?

²⁰⁵ Dibuundu zolaka vwanda ya kukubama samu na lukumu ya bana, kisika muntu. . . Nzambi lenda baka muntu mosi mpe kupesa yandi lukumu na kati ya dibuta, mpe kupesa yandi kima mosi. Ti, ntete, beno meka yawu mpe beno tala kana ya kele mbote. Biblia me tuba na kumeka mpeve. Muntu yayi ke tuba ti ya ke na kima mosi, beno meka yawu mpe beno tala kana ya kele mbote. Kana ya kele mbote, beno kwenda na ntwala na yawu. Na manima beno tuba, “Mfumu, tinda beto kima yankaka.” Beno landila na kukwenda na ntwala, beno me mona, beno landila kaka na kukwenda na ntwala tii kuna konso muntu ke baka kisika ya yandi. Na yawu beno ke mona dibuundu ya Nzambi ke banda na kubaka kisika ya yawu. Na ntangu yina ba-Philistin ke vutukisa na manima. Bakupé ke katuka, bansuki ke yela, bizizi ke kusukwama; mafumu ke zimbana. Ya kieleka. Ntangu Dibuundu ke banda na kukota na lulendo ya Ngolo ya yandi, ntangu beto ke kuzwa Ananias na Saphira, mpe bayankaka mutindu bawu. Yinga, tata. Beno ke mona ntangu Dibuundu yina ya santu ke telema kuna na Ngolo ya Yandi, na ntangu bana nionso ya Nzambi ke baka kisika ya bawu, ke baka lukumu na kati ya dibuta ya Nzambi, Dibuundu ya ngolo ya Nzambi me telema kuna na nkembo ya yawu. Oh, tala yina Yandi ke kwisa kusosa.

²⁰⁶ Beno me mona yinki mutindu beto kele ntama, bampangi? Beno lenda wisana ve na Masonuku. Mpe muntu nionso, muntu yina nionso me monaka ntete ve mbotika ya masa na kati ya Biblia, na Nkumbu ya Yesu Klisto, to ya ke mpofo to kima mosi ke tambula mbote na yintu ya yandi. Ya kieleka. Mpe ya ke kisika yina kuswana ya nene kele.

207 Mu ke—mu ke lomba na konso muntu yina na kukwisa talisa na munu Masonuku sika wapi muntu mosi me bakaka mbotika na nkumbu yankaka na nganda ya Nkumbu ya Yesu Klisto, na dibuundu ya malu-malu. To, kana ba me botikaka yandi na mutindu yankaka, ya fwana baka mbotika na Nkumbu ya Yesu Klisto, samu na kuzwa Mpeve-Santu. Beno kwisa talisa na munu. Ya kele ve. Ya ke na kusalu ya mutindu yina ve. Ntangu Yesu tubaka kuna, “Beno kwenda, beno longa na yinza ya mvimba, beno botika bawu na Nkumbu ya Tata, Mwana, mpe Mpeve-Santu.” Tata, Mwana, to Mpeve-Santu, ata mosi ve kele nkumbu, ata mosi ya yawu ve. Pierre balukaka, na manima ya bilumbu kumi, yandi tubaka, “Beno balula bantima, mpe beno baka mbotika, beno nionso, na Nkumbu ya Yesu Klisto, samu na mulemvo ya masumu.” Mpe bisika nionso na kati ya Biblia.

208 Na manima ya vwandaka na bayankaka yina bakaka mbotika kuna, na mutindu yankaka, na nzila ya Jean, kana na mbotika ya kubalula bantima. Paul tubaka, “Beno fwana baka diaka mbotika. Beno fwana kwisa diaka.”

209 “Oh, kasi beto bakaka mbotika na muntu ya nene ya santu, Jean. Yandi botikaka Yesu.”

210 “Mbote mingi, yayi ke Nsangu ya mbote. Yayi kele yina Mpeve ya Nzambi me monikisa na munu. Mu kele ntumwa ya Mfumu, mpe kana wanzio me katuka na Mazulu mpe yandi longa kima yankaka . . .”

211 Beno bika mu tanga yawu. Biblia me tuba, “Kana wanz- . . .” Paul tubaka, “Kana wanzio me katuka na Mazulu me tuba kima yankaka,” évêque, archevêque, pape, surveillant, muntu nionso yina ya lenda vwanda, “kana yandi longa kima yankaka na nganda ya Yayi mu me longa beno, yandi vwanda ya kusinga.” Ya kele ve . . . Beto ke na nkadulu ya mutindu yina. Ve, tata. Beno ke kaka . . . Ya ke kaka na kima ya mutindu yina. Beno, beto . . . Na yawu—na yawu, beno me mona, samu na yinki bantu lenda mona yawu ve? Samu na yinki bantu ke zolaka ve—ke zolaka, ke zolaka ve kukwikila yawu? [Muntu mosi na kati ya dibuundu me tuba, “Ya kukubika”—Mu.] Beno me mona? Muntu mosi me bula kisika yango, Gene. “Ya kukubika,” ya kieleka. Samu na yinki? “Bayina nionso Tata pesaka Munu ke” (yinki?) “ke kwisa na Munu.” Ya kieleka! “Bayina nionso Tata pesaka Munu ke kwisa, ke kwisa na Munu.” Yinki kele diambu ya munu, yina mu ke meka na kuzwa awa? Beto me kuma kisika yango. Mbote mingi.

212 Beno bika mu tangila beno nzila yayi na manima mu ke tuba na beno yina Paul, bima yina . . . Nsangu yina mu me longa na nkokila yayi, awa kele yina Paul tubaka na yina me tala lusolo ya ntete, samu na mbotika ya masa na Nkumbu ya Yesu, mbotika ya Mpeve-Santu, kisika ya dibuundu, mpe nionso yina. Tala yina yandi tubaka.

Mu ke yituka (yandi ke tuba na bantu ya Galates) ti beno me balukila na mbala mosi yandi yina bokilaka beno samu na . . . lemvo ya Klisto . . .

Mu ke na nsoni ya beno, na mutindu yankaka, ti beno me bika muntu mosi kukwisa mpe kubalula mabanza ya beno na Yawu, *samu na nsangu ya mbote yankaka:*

Ya ke na yankaka ve; kasi ya ke na bantu ke balula mabanza ya beno, mpe zola kanga nzila na nsangu ya mbote ya Klisto, kukanga nzila na Nsangu ya mbote ya kieleka ya Klisto.

213 Kasi beno tala. Ntangu yayi, beno bambuka moyo, ya vwandaka Paul yina tumaka na ngolo muntu nionso yina bakaka ve mbotika na Nkumbu ya Yesu Klisto, na kukwisa mpe yandi baka diaka mbotika na Nkumbu ya Yesu Klisto. Bantu yikwa kuzaba ti ya ke ya kieleka? Bantu yikwa kuzaba ti ya vwandaka Paul yina tubaka ti mansweki yayi vwandaka ya kubumbama kubanda mbatukulu ya yinza, mpe ya me monisama na yandi, ti ba kubikaka beto samu na kuvwanda bana, mpe, samu na lukumu ya bana. Ya vwandaka Paul. Beno tala awa yina yandi tubaka.

Kasi ata ti beto, to wanzio mosi me katuka na zulu, kulonga beno nsangu ya mbote yankaka na kisika ya yina beto me longa beno, yandi vwanda ya kusinga.

214 Beno tuba kaka ve, “Mu ke wisana na nge ve, tata.” Yandi vwanda ya kusinga. Beno bika mu tanga nzila yina me landa.

Mutindu mu tubaka ntete, mu ke tuba mutindu mosi diaka na ntangu yayi, Kana muntu mosi kulonga na beno nsangu ya mbote yankaka na kisika ya yina beto me yambaka ntete, bika yandi vwanda ya kusinga.

215 Ya kieleka. Ntangu yayi, mpangi-bakala, mpangi-kento, kana ya vwandaka Nzambi kilumbu yina, mpe mu—mu ke tuba yawu mpe mu banza ti mu ke kondwa luzitu ve, yina nataka munu na kumona mwa . . . Ntangu yayi, mu ke na nsayi; mu banza ve ti mu ke na nsayi, mu ke ya kusakumuka ntangu mu ke longaka. Mu ke kukiya diaka ve mpe ya ke sala ti mu baka beno ntangu ya yinda kasi mu zaba ti beno ke na mpongi mpe ya kulemba. Kasi, oh, mu . . . Kana beno—kana beno lendaka zaba kaka yinki mutindu mu zola ti beno vwanda kuna! Beno me mona? Mpe ntangu mu, mbala mosi diaka mu ke vutukila yawu, ntangu mu . . . ntangu Yandi tubaka . . . Mu tubaka, “Ya lendaka sala . . .”

Yandi tubaka, “Nge zola mona yina nsuka kele?”

216 Mpe mu balukaka mpe mu kukimonaka ya kutandama na zulu ya mbeto. Ya kieleka beno me zaba munu kubanda ntama ti—ti—ti mu ke tubaka na beno Kieleka. Mu zola yufula beno kiuvu mosi, mutindu Samuel tubaka na ntwala ba kukusa Saül,

mu me tubaka na beno ntete kima mosi na Nkumbu ya Mfumu kasi yina vwandaka ya kieleka ve? Ya kieleka? Ya ke vwandaka ntangu nionso ya kieleka. Mu me kwisaka ntete na beno samu na kulomba beno mbongo to kima mosi ya mutindu yina? Ve, beno me mona, mu me salaka yawu ata fioti ve. Mu me salaka ntete kima yankaka na kisika kusala nionso mu lendaka sala samu na kutwadisa beno na Klisto? Ya kieleka.

²¹⁷ Ntangu yayi ba zola tuba ti mu ke muntu ke zabaka mabanza ya bantu, beno zaba, ti mu ke salaka mbanzulu ya mabanza mpe ya ba-sense. Mpamba ve, mambu yina fwana salama, Biblia me tuba me tuba yawu. Mutindu Jambres na Jannes teleminaka Moise, ba salaka kaka kima ya mutindu mosi Moise salaka, tii kuna ya kumaka ntangu ya kumeka ngolo. Ya kieleka. Kasi beno bambuka moyo, Jambres na Jannes lendaka belusa ve. Ba lendaka belusa ve. Ba lendaka bokila bampasi, kasi ba lendaka kukatula yawu ve. Beno me mona? Mbote mingi. Ntangu yayi, Nzambi kele Munganga. Ndinga ya Nzambi kele kaka Kieleka.

²¹⁸ Mu ke mekaka na kuvwanda ya kuvedila na beno. Mu ke mekaka na kutuba na beno Kieleka. Mu me—mu me . . . pene ya bamvula makumi tatu na mosi, mu me telema na chaire yayi, ntangu nionso, bamvula makumi tatu na mosi, mpe kilumbu mosi ya lenda salama ti mu katuka samu na chaire yayi samu na kukwenda na Nkembo. Ya ke na kento mosi ya makwela, mwana mosi ya kento, tata, mpangi-bakala bawu nionso ba me zika bawu kuna, bankundi ya luzolo. Mu talaka basanduku ya bawu na bafelele ba me tulula awa. Mpe mu zaba ti kilumbu mosi ya ke vwanda samu na munu, mpe. Ntangu yayi, ya ke kieleka. Kasi ya kieleka, na ntima ya munu nionso, mu ke tuba na beno na ntima ya munu nionso, Mu ke kwikila ti mu me longa beno Nsangu ya mbote ya kieleka ya Mfumu Yesu Klisto. Mu ke kwikila ti beno fwana baka mbotika, beno nionso, na Nkumbu ya Yesu Klisto, mpe beno kubaka mbotika ya Mpeve-Santu. Mpe ntangu beno ke sala yawu, ya ke natila beno kiese, ngemba, ntima ya yinda, mambote, lembami, lutondo, mvibudulu, lukwikilu.

²¹⁹ Mpe kilumbu yina, yina salamaka na munu na suka yina, mu zaba ve. Mu lenda tuba yawu ntete ve kana mu vwandaka awa na nzutu ya munu mpe ti mu kuzwaka kaka vision, to kana ba zangulaka munu awa, ba nataka munu kuna. Mu zaba ve, mu lenda tuba yawu ve. Kima mosi kaka mu zaba, ti mu—mu vwandaka ntangu nionso na boma ya lufwa, mwa kisika yina ya ntunga. Kasi mu vwandaka na boma ve ti Yesu kukwisa sosa munu ve, ntangu yayi, mu vwandaka na boma ya yawu ve, samu mu—mu vwandaka banga yawu ve; kasi ya kukutana na beno mpe beno vwanda kaka mwa dituti yina ke tepa na mupepe. Kasi mu me mona ntangu yayi. Ntangu mu monaka bantu yayi, ba vwandaka bantu ya kieleka. Mpe ba vwandaka bantu yina mbala mosi vwandaka na ngwisani na munu awa na zulu ya ntoto, mpe na kento ya munu ya ntete. Yandi vwandaka kento ya munu

ve, yandi vwandaka mpangi ya munu ya kento. Yandi bokilaka munu ata fioti ve bakala ya yandi, yandi bokilaka munu mpangi ya yandi ya bakala ya luzolo. Ya vwandaka na ata kimpene ve, bansatu ya mutindu yina vwandaka ve, ya lendaka vwanda ve; ya vwandaka ya kulunga, ya vwandaka kitoko, ya vwandaka ya kulunga.

Mu ke kukiyufula, mu zaba ve, mu ke kukiyufula: Yawu yina yandi monaka, na ntwala yandi bika ntoto yayi, ntangu ya vwandaka kuna na lupitalu, ntangu mu bokilaka yandi? Mpe yandi tubaka, “Bill, nge longaka yawu, nge zonzilaka yawu, kasi,” yandi tubaka, “nge zaba ve yina yawu kele.” Yandi tubaka, “Mu ke diaka ve na nsatu ya kuvwanda awa.”

²²⁰ Mu ke kukiyufula kana ya ke mutindu yina, na kiboba muntu yina ya bunzambi, muntu ya santu F. F. Bosworth, yina telemaka na chaire yayi, yina longaka na munu na bisika ya mutindu na mutindu na yinza. Kiboba yayi F. F. Bosworth, beno nionso, mu banza, me zaba yandi; kiboba ya muntu yayi ya santu. Bangunga zole na ntwala, mbote, pene ya lumingu mosi to zole na ntwala yandi me kwenda, mu kwendaka na yandi mpe ya vwandaka ya kutandama kuna na manima, mutindu yayi, pene ya bamvula makumi yivwa. Na mwa maboko ya yandi kufungula, na mwa dibasi ya yandi mpe mandefu ya mpembe na kizizi ya yandi. Mu yambaka yandi kiboba yina mpe mu bokaka, “Tata ya munu, tata ya munu, pusu ya Israel na minati-mpunda ya yawu.”

Kana ya me vwandaka ntete na muntu yina me talisaka Pentecotisme mpe yina vwandaka ntumwa ya kieleka, ya vwandaka F. F. Bosworth, kukondwa mvindu, ya kusungama, Nsangu ya mbote ya kieleka, ya vwandaka Bosworth. Mpe ntangu mu yambaka yandi, mpe mu bokaka, “Tata ya munu, tata ya munu, pusu ya Israel na minapi-mpunda ya yawu.”

²²¹ Yandi tubaka, “Mwana, bikala kaka na kilanga ya kisalu.” Yandi tubaka, “Kwenda kuna na bilanga ya kisalu na ntwala ya bantwenia yayi, kana nge lenda, na ntwala ba kotisa mingi ya bufanatiki kuna. Natila bawu Nsangu ya mbote yina nge ke na yawu, mwana.” Yandi tubaka, “Kisalu ya nge me banda ntete ve na yina ya ke vwanda.” Yandi tubaka, “Nge ke Branham ya malu-malu.” Yandi tubaka, “Nge kele ntwenia, mwana.”

Mu tubaka, “Mpangi Bosworth, mu ke na bamvula makumi yiya na nana.”

²²² Yandi tubaka, “Nge me banda ntete ve.” Yandi tubaka, “Kubika ve bantwenia yayi ya balongi ya ba-Pentecotiste na mingi ya buzoba, mpe kutula ndikila kuna, mpe kusala ti ba-diplomate nionso mpe yinsi ya muvimba kutelemina Yawu na ntwala nge kuma kuna.” Yandi tubaka, “Kwenda na ntwala, Mpangi Branham, kwenda na ntwala na Nsangu ya mbote yina nge ke na yawu.” Yandi tubaka, “Mu—mu ke kwikila ti nge ke ntumwa, to profete ya Mfumu Nzambi ya beto.”

223 Mu talaka yandi, mu yambaka yandi. Mu tubaka, “Mpangi Bosworth, mu zola yufula nge kiuvu mosi. Yinki kele ntangu ya nge ya kulutila kitoko . . . ntangu ya nge . . . na bamvula ya nge nionso nge me longa?”

Yandi tubaka, “Ntangu yayi, Mpangi Branham.”

Mu tubaka, “Nge zaba ti nge ke kufwa?”

Yandi tubaka, “Mu lenda kufwa ve.”

Mu tubaka, “Yinki . . . Samu na yinki nge ke tuba ti yayi kele ntangu ya nge ya kulutila kitoko?”

224 Ya wandaka na mwa kielo mosi ya fioti. Yandi tubaka, “Mu me tandama awa na kizizi ya munu ke tala na kielo yina. Na muniti mosi na yankaka, Muntu yina mu zolaka, mpe Muntu yina mu longaka mpe samu na yina mu telemaka, nionso yayi . . . luzingu ya munu ya muvimba, Yandi ke kwisa na kielo yina samu na munu, mpe mu ke kwenda na Yandi.” Mu talaka yandi, mu banzaka, mu—mu talaka yandi mutindu mosi mu lendaka tala Abraham, Isaac, to Jacob.

225 Mu simbaka yandi na diboko, mu tubaka, “Mpangi Bosworth, beto zole ke kwikilaka Nzambi mosi, beto ke kwikilaka kima mosi. Na lemvo ya Nzambi mu ke longa tii na pema ya munu ya nsuka ke bika nzutu ya munu. Mu ke bikala kieleka na Nzambi na mutindu nionso. Mu ke kakula ve Nsangu ya mbote kisika mosi ve to lweka mosi ve to kisika mosi ve. Mu ke wandaka ya kwikama. Mpangi Bosworth, mu ke kutana na nge na Yinsi ya kulutila kitoko kisika beno ke vwanda ntwenia ve . . . to nge ke nuna diaka ve, kasi nge ke vwanda ntwenia.”

226 Yandi tubaka, “Nge ke vwanda kuna, Mpangi Branham, kuvwanda na boma ve.”

227 Mpe ngunga mosi na ntwala, bangunga zole na ntwala yandi kufwaka . . . pene ya bangonda zole na ntwala, mu banzaka ti yandi zolaka kufwa na ntangu yina, kento ya munu kwisaka tala yandi (yandi wandaka banza yandi ntangu nionso), yandi na Mama Bosworth. Mpe pene ya bangunga zole yandi wandaka ya kutandama kuna, ya kulala. Yandi vumbukaka, yandi talaka, mpe yandi dumukaka na mfulu ya yandi. Yandi tubaka, “Mama, mbote, mu me mona nge ve bamvula mingi! Tata! Mpangi Jim, tala,” yandi tubaka, “tala, nge wandaka mosi ya bandimi ya munu yina mu nataka na Mfumu, na Joliet, na Illinois.” Yandi kufwaka bamvula makumi tanu. Beno me mona? Yinga! Yandi tubaka, “Nge ke Mpangi-kento *Kingandi*. Yinga, mu twadisaka nge na Mfumu na—na lukutakanu ya Winnipeg. Yinga. Tala, yayi Mpangi-kento *Kingandi*. Mu me mona nge ve . . . Yinga, beno me mona, nge kwisaka na Mfumu na kisika *kingandi*.” Mpe na bangunga zole yandi pesaka mbote na bantu yina yandi twadisaka na Mfumu. Yandi vutukaka na kisika ya yandi, mpe tandamaka, yandi kangaka maboko ya yandi, mpe yimeni.

Mpangi F. F. Bosworth kotaka na Yinsi yina Yesu talisaka munu na mpimpa yina? Kana ya ke mutindu yina, yandi kele kuna ntwenia ya bakala na nkokila yayi. Nzambi kupemisa moyo ya yandi. Mpe bika mu zinga ntangu nionso ya kwikama ti mu ke kota na Yinsi yina. Mpe bika mu vwanda musadi ya kieleka ya Klisto!

²²⁸ Mu ke na nsoni ya luzingu ya munu. Mu ke na nsoni. Mu—mu—mu. . . Kana mu sumukaka na ntuala ya beno bantu, beno—beno lenda kwisa tuba yawu na munu. Beno me mona? Mu ke meka na kuzinga luzingu ya mbote na yina nionso Nzambi me pesa munu muswa ya kusala na lemvo ya Yandi. Beno me mona? Beno me mona? Kasi, beno tala, bankundi ya munu, beno lenda kwisa tuba na munu kana beno zaba konso kima yina ke tambula mbote ve na luzingu ya munu, beno kwisa tuba yawu na munu. Mpe, beno tala, mu fwana telema awa samu na kulonga beno Nsangu ya mbote ya kieleka. Mu fwana sala yawu, samu ke na kuvingila na kumona bizizi ya beno nionso, babakala ya bantwenia na bakento ya bantwenia, na simu yina ya ndilulu. Ya ke kaka mupepe mosi kati-kati ya kisika beno kele ntangu yayi na kisika yina. Ntangu yayi, ya kele mbote. Ya ke kuna.

²²⁹ Mpe bika Nzambi ya lemvo nionso, Nzambi ya Mazulu, na mutindu ya kufinga ve, kasi na luzitu, “Tata,” na kilumbu yina ya nene ntangu beto ke telema diaka awa mpe beto ke kuzwa diaka banzutu ya beto ya ntoto, na yina beto lenda kunwa, mpe kudia bambuma ya raisin mpe bambuma ya yinsi. “Ba ke tunga bayinzo mpe muntu yankaka ke botula yawu ve. Ba ke kuna bayinti ya vinu mpe muntu yankaka ke kudia yawu ve.” Beno me mona? Muntu mosi ke kuna yinti ya vinu, mwana ya yandi ke kubaka yawu, mpe na manima mwana ya yandi ke kubaka yawu, mpe na manima mwana ya yandi. Kasi na ntangu yayi ve; yandi ke kuna yawu mpe ya ke vwanda kuna. Beno me mona, ya ke mbote. Beto ke vwanda kuna kukonda nsuka. Mpe, na Yinsi yina, mu ke mona beno nionso.


²³⁰ Mpe mu zaba ti mu ke tuba mpe na balongi ya ba-trinitaire. Mpe, bampangi ya munu, mu ke tuba yayi ve—mu ke tuba yayi ve samu na kuniongisa beno. Mu ke trinitaire, mpe, mu ke kwikilaka na butatu, bisalu tatu ya Nzambi (Tata, Mwana, mpe Mpeve-Santu), kasi Banzambi tatu ve. Beno me mona? Mu ke kwikilaka ti ya ke na bisalu tatu, ya kieleka, mu ke salaka yawu na ntima ya munu ya muvimba, “Tata, Mwana, mpe Mpeve-Santu,” kasi ba ke Banzambi tatu ve. Ya ke kaka bisa- . . . tatu to bisalu tatu ya Nzambi. Mbala ya ntete Nzambi zingaka na Butata, Bumwana, mpe ntangu yayi Mpeve-Santu. Ya ke Nzambi mosi na bisalu tatu. Mpe ba ke . . .

²³¹ Mpe Tata, Mwana, mpe Mpeve-Santu, kele Nkumbu ya Nzambi ve. Nzambi kele kaka na Nkumbu mosi, mpe Nkumbu ya Yandi kele Yesu. Biblia me tuba, “Dibuta na Mazulu kele

ba me bokila bawu Yesu, mpe dibuta na ntoto ba me bokila bawu Yesu.” Ya kieleka. Na Nzambi vwandaka na Nkumbu mosi, Nkumbu ya kimuntu. Yandi vwandaka . . . vwandaka na nkumbu ya Yehova Jiré, Yehova rafa, yina vwandaka bisalu ya Yandi ya Bunzambi. Kasi Yandi vwandaka na Nkumbu mosi, Yesu! Mpe ya kele Yandi.

²³² Mpe ya kieleka, bampangi ya munu, kana beno ke wisana na munu ve, beno bambuka moyo, mu—mu—mu ke kutana na beno kuna, na mutindu nionso. Beno me mona? Mu—mu ke vwanda kuna na beno. Mpe Nzambi sakumuna beno. Mu zola beno.

²³³ Mpe mu zola dibuundu kubambuka moyo ntangu yayi, Lumingu na suka beto ke banda awa mpe mu ke meka na kukanga beno ntangu ya yinda ve kulutila ngunga ya zole na mutindu ti beto lenda vwanda na lukutakanu na manima ya midi, kana beto lenda sala yawu, mpe kana mu lenda sala yawu mpe na nkokila yayi, ngunga kumi na ndambu. Beno me lemvočila munu? Bankundi ya munu, beto me bikala diaka ve na ntangu mingi, ba-cheri. Mu—mu ke bokila beno “ba-cheri” samu beno ke mutindu yina. Beno—beno ke ba-cheri ya munu. Beno zaba yinki? Bika . . . Tala Disonuku me kwisa. Paul tubaka, “Mu ke na zuwa ya beno (Dibuundu ya yandi) na zuwa ya kinzambi, samu mu pesaka beno nsilulu ya kukwelisa beno.” Beno me kuma kisika yango, yawu ke kuna. Yawu yina. “Samu mu pesaka beno nsilulu ya kukwelisa beno, na bakala mosi Klisto, mutindu mwense ya kento.”

²³⁴ Ntangu yayi, kana yina vwandaka kieleka na kilumbu yina, yandi tubaka . . . Bawu, bantu yina tubaka na munu, ba tubaka, “Yesu ke kwisa na nge, mpe nge ke talisa Yandi na beto,” mwense ya kento. “Ba ke sambisa nge samu na Ndinga yina nge longaka bawu.” Mpe, tala, kana mu ke longaka beno kaka yina Paul longaka na dibuundu ya yandi, kana kimvuka ya yandi kukota ya beto mpe ke kota, samu beto me longa mutindu mosi. Amen. Beto kulumusa bayintu ya beto ntangu yayi na ntangu beto ke tuba, “Nzambi sakumuna beno.” Ntangu yayi . . . ? . . . pasteur ya beto ya luzolo, Mpangi Neville. 

60-0518 Lukumu Ya Bana #2
Branham Tabernacle
Jeffersonville, Indiana U.S.A.

KIKONGO-KITUBA

©2020 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org